



取
堂
存
稿






叢書集成
初編

主編者
王雲五

商務印書館發行



稿存堂取



撰得斯高

恥堂存稿卷五

說

廣居說

永嘉陳君所爲便坐。命曰廣居。屬予書之。而發其義。予謂廣居之義大矣。難乎其爲言也。學者必先識其所謂者。而用力焉。然後可乎。是居者何。宅心之地也。易曰。修辭立其誠。所以居業也。又曰。寬以居之。書曰。惟厥攸居。蓋皆有主于中。守而不去之義。如人之有家焉。朝于斯。夕于斯。常而不厭。然後志定而業成。夫旣識其所居矣。而能充之以學問。拓之以義理。不措于偏見。不汨于私欲。逮夫養熟理融之後。心體渾然。萬境俱徹。四海八荒。皆在吾宇。居其有不廣乎。嗚呼。此仁者之事。學者所當立以爲的。而俛焉孳孳者。故予願與陳君勉之。

史巽之兩溪說

坎。流水也。兌。止水也。兩溪交流。坎之重卦象焉。兩澤相麗。兌之重卦象焉。水與澤相近而不同。故易六十四卦。未有以兌爲水者。予方爲季申明兩溪之義。請置兌而論坎。夫坎之爲卦。心亨而體勞。遺安君從容鄉邑之間。尊師講道。安土樂天。其得坎之亨者乎。季申棲遲蒼雪兩溪之間。遺佚不怨。阨窮不憫。其得坎之勞者乎。然勞之中有亨道焉。不可不知也。季申儻能思遺安之訓。隱居以求其志。固窮以守其身。則疏

食飲水樂在其中。其何享如之。季申借兩溪之名。以寓維梓之思。善矣。予復推其意以告之。其亦以爲然乎。

陳堅字子固齋字子思說

聖學二曰知與行而已。然非通之以思。則知不明。非守之以力。則行不實。二者相須。不可偏廢也。易曰。知至。至之可與幾也。知終。終之可與存義也。又曰。知崇體卑。崇效天。卑法地。語曰。知及之。仁不能守之。雖得之。必失之。又曰。知者樂水。仁者樂山。四者辭異。其指則同。知至。至之主于知。知欲其明。故曰可與幾。知終。終之主于行。行欲其力。故曰可與存義。智以知識。言欲高明。而如天。禮以持守。言欲安固。而如地。智以通理。如水之周流。仁以守道。如山之堅確。一知一行。交進互益。此學之大方也。永嘉陳宗。名其二子。曰堅。曰齋。而遺予書曰。公爲我字之。且發其義。予謂堅于文從土。其義有不待辨。若齋之義。當以洪範明之。洪範五事。皆以本然之性而言。思曰。睿者。思其自然之睿。人皆有之。非聖人所獨得。其文義則通而已。二子之于學也。苟能致其齋以思之。堅其守以固之。如手足相須。而不可相無。知行互發。不能自己。則其進也。庸詎知其所止乎。請字堅曰子固。齋曰子思。雖皆昔人已行之字。然合而言之。以盡其義。則此乎。昉春秋之意。不嫌同辭。兄弟一體。固不得而析也。陳君以爲然。則願以告乎。二子。有可往復。幸無辭焉。

唐近仁字學行近道字學知說

仁與道。難言也。肫肫浩浩。與天同體。學者茫然而求之。烏能闡其藩哉。故聖人教人。常自其近者言之。曰。

剛毅木訥近仁。曰力行近乎仁。曰強恕而行。求仁莫近焉。曰知所先後。則近道矣。曰忠恕違道不遠。凡皆示人求端用力之要。使之即用以明體。因顯以識微。近而不已。則亦終至其域而止耳。零陵唐直夫取中庸之義。名其長子曰近仁。而字以學行。取大學之義。名其仲子曰近道。而字以學知。求予一言發其義。夫力行非仁也。何以近乎仁。知所先後非道也。何以近乎道。蓋行者仁之實。而知者道之門也。中庸三知者之事也。三行仁者之事也。行不近于仁乎。近仁而欲無愧其名。則當深體力踐。俛焉孳孳。毋憚任重道遠而不力。毋以色取行遠而自欺。行之不已。仁遠乎哉。大學之道。自誠意正心至于治國平天下。條目衆矣。而其綱領。以致知爲先。知不近于道乎。近道而欲無愧其名。則當懲治本心。精擇義理。毋溺于利欲。以汨其明。必謹于幾微。以擇所嚮。知之至。道不遠人矣。雖然。二者非學不能。知非學則不明。行非學則不力。易曰。學以聚之。問以辨之。寬以居之。仁以行之。記曰。人不學不知道。直夫字二子以知行。而貫之以學。其有見于此矣。然而猶有說焉。先儒謂知行如人兩足。不可偏廢。二子其觀予文。交警互發。則有以知夫仁與道。一而二。二而一矣。嗚呼。尙勉之哉。

純彥字韓孺說

先君子嘗言古者以王父字爲氏。今宜倣此。名諸孫以純。以開府公字公純故也。予第五子純彥。字之曰韓孺。蓋竊取忠獻諸子之名。俾徼福焉。我朝世家之盛。莫如韓。呂韓公忠貫日月。慶留苗裔。予以匹夫慕之。亦有說焉。且公之諸子。或秉國均。或備禁衛。勳名富貴。赫奕一時。純彥居其間。皆不能及。而其平生行

事亦未有卓然登于史氏者。予果何取焉。取其生長燠閭。不忤不驕。以保門戶。稱其家兒而已。家人六四。富家大吉。象曰。富家大吉。順在位也。言順理以保其家。蓋非易事。故于一卦。吉莫大焉。嗚呼。吾邦喪亂以來。故家流落。後生不謹。以墜其世多矣。予甚懼焉。乃發此義以示警。嗚呼。小子其念之哉。

純魯字參孺說

余弟不器甫名其子曰純魯。蓋撫秦齊鐘銘之文。字之曰參孺。則取論語曾子之義。屬余爲之說。余謂秦銘所謂純魯多釐。齊銘所謂萬福。純魯有質厚之義。不過言受福之厚而已。與論語所云。若不相似。不器借其文以名子。猶賦詩斷章云爾。姑置二銘。專明孔氏之訓。先儒訓魯爲純。言其受性之偏。非美之之辭也。果何取于魯乎。蓋聰明才智之人。未必聞道。而質朴純魯者。往往得之。何也。敏者見之既易。故守之不堅。而魯者因其造理之難。故用心專一。探索鑽研。不得自己。既得之難。故守之堅。此曾子所以絕出三千之徒。而猶傳聖人之道也。嗚呼。天之降才于人。亦不一矣。賢者能因其資而用力焉。則其賦性之偏。反爲受道之地。向使曾子不知用力。則亦終於魯而已矣。何足貴乎。余觀不器之子。疏通闡暢。非遲鈍者。顧以魯名。惟父知子。必有深意。豈欲其實直務實。以濟其所不足乎。是則以曾子之病。爲純魯之藥。意雖少異。而皆可以入道。純魯繼自今。其亦依親之言。體親之志。去使儼皎厲之習。爲篤實敦厚之歸。毋悅紛華。毋意輕銳。砥礪于問學。沈潛于義理。以無虛乎嚴君名子之意。是予之所望也。嗚呼。純魯其亦念之哉。

純約字謙孺說

予弟不流甫之子。舊名純一。不流書求欲予爲之更名。且字之。而爲之說。予謂幼名冠字。攷之經傳。鮮有更者。獨小戴所記。父母在。許其更名。況父之命而非自更之乎。故予不曰不可。而名之純約。字以謙孺。名取左傳在約思純之義。字則兼取潘安仁所謂福謙在純約者焉。夫約者。何也。不侈然以自大之謂也。人之自守者約。則篤實而不濫。收斂而不華。其行己也恭。其用物也儉。其爲學也要。聖人示人入道之門。積德之基。未有不由此者。故曰以約失之者鮮矣。然非其心純乎義理。不雜于利。不累于物。安能至此。夫既能以純居約矣。則天下之謙何加焉。天之所益。人之所好。鬼神之所福。捨此焉往。春秋之世。未必能盡此道。若安仁徒能言而不能行。故卒盈以取禍。我朝有刁約景純者。少與歐富齊名。蘇文忠稱爲前輩。推尊甚至。蓋能不愧其名者。孔門之約。未易驟語。純約其亦希前修之行。由是而進。以求造乎顏曾之域可也。嗚呼。其亦懋敬之哉。

蹇叔潛字成子說

蹇之兄子蹇叔潛。予所名也。始字淵子。復改符子。一日請曰。二子皆未稱公所賜名。請更之。予字以成子。而語之曰。子達成之義乎。在易乾之初。潛龍勿用。夫子翼之。以爲不成乎名。行而未成。夫乾六爻。皆聖人之事。聖人何不成之有。自學者言之。則窮而未達之時也。名無所聞。行無所見。非未成而何。故潛也者。君子進德修業之基。濟時行道之本也。人能于此時。刻志勵行。篤學力行。思其所未達。勉其所未信。不以人之所不見而自欺。不以世莫我知而自畫。使大學修齊治平之具。皆備于我。他日出潛離隱。舉而措之。其

所成就當何如哉。孟子曰：舜發于畝畝之中，傅說舉于版築之間，膠鬲舉于魚鹽之中，管夷吾舉于士，孫叔敖舉于海，百里奚舉于市，六者皆困于潛者，用力有淺深，所就有大小，然其爲有成一也。成子其勉之哉。

范震龍字子雲說

蜀公之九世孫范震龍季從訪于湘中，曰：吾字取諸易文言傳，而未知其說，公爲我言之。予謂水火燥溼，其義甚著，雲龍風虎，曷爲亦以類言。蓋龍，陽物也；雲于易亦爲陽，虎，陰物也。風于易亦爲陰，同氣相求，其從之宜也。雖然，子之字是矣，然混而無別，果孰從乎。蓋以子雲易之昔人名字，以雲龍相配者多矣。如陸雲而字士龍，范雲而字彥龍，蓋其著者。士龍以雲間自處，非不高也，而二十四友之汙陷身濁淖，雲龍駸駸固若是乎。乃若彥龍朝聞夕死之事，其所依乘，尤君子之所鄙笑。二子皆非予所願于范君也。夫龍之爲物，鍾天地之至陽，其體清輕，其性靈異，而雲以至陽之氣爲之憑依，其乘時變化，功用不測。凡有血氣之類，安得而擬之哉。易六十四卦，窮天下之象，而龍爲首，飛潛見躍，各有其義，非獨聖人爲然。學者皆當體之。范君究玩于斯而有得焉，則知其蟄也，所以存吾身，其出也，所以行吾志，不得時而龍蛇，毋如子雲之空言而竟辱其身，得時而風雲，毋如陸范之自失而貽笑于世，則朋友相字之意，庶乎其不虛矣。嗚呼，范君其亦勉之哉。

王琚字君度說

吾友王深道名其子曰琚。遺予書曰：爲我字之，併爲之說。庶知乃父有友如此，且使佩德言以無愧其名也。予曰：諾哉。乃字以君度而申其義。夫佩玉之名，五曰珩、璜、琚、瑀、瑯，衝牙大毛公曰：佩有瓊琚，所以納間。蓋佩玉之制，惟琚納于珩，璜上下之間，所以管攝衆玉者也。故古人言佩，獨琚得專其名，而四者不得。如曰佩玉瓊琚，報之以瓊琚，可見然則佩者所以節度乎身，而琚者又所以節度乎佩者歟。傳曰：古之君子必佩玉，周旋中規，折旋中矩，進則揖之，退則揚之，然後玉鏘鳴也。又曰：旣服習容觀，玉聲凡皆以其切近于身，可以斂敖惰之氣，閑非僻之心焉爾。然其爲制也，必有一玉焉，居其總會以節度之，名物之中有精義存，是豈苟焉者哉。琚也而知乎此，起居動作，其無一而不求合乎度焉。謹言謹行，常懼悔尤者，守身之度也。愉色婉容，交盡敬愛者，事親之度也。篤恩厚別，承口寧尊者，齊家之度也。刑善親仁，戴抱忠信者，取友之度也。權衡輕重，劑量辛甘者，接物之度也。廣而充之，跬步之間，終食之頃，皆不越乎檢防。夫如是，則嚴君名字，師友責善之意，庶乎其無負矣。然而抑有說焉。夫度者，降衷自然之則，非強加束縛于人也。始佩玉者，容止進退之間，若有拘牽之者，久則安之矣。度之于人亦然。善乎呂成公之說曰：規矩法度，未至于樂，循理若維繫，然其中自有安泰恬愉之地。琚雖未及乎此，然有味斯言，俛焉孳孳，安知不終闢其藩也。嗚呼，尙勉之哉。

銘

江鎔習齋銘

人之知道。由學之故。學而不習。學則不固。生熟之度。盍驗諸心。九醞味厚。七八色深。是以中庸。貴乎弗措。所謂知新。弗離乎故。或釋于中。或體于行。表裏互發。精義入神。顏曾以之。優入聖域。予何人哉。胡不是則。吳巽之友竹齋銘

生天地間。性命于氣。匪人獨然。伊物無二。惟竹之生。受直于天。貫乎四時。既勁既堅。禮居大端。詩美令德。一言蔽之。莫尚乎直。潛聖論友。以直爲先。吳子友竹。吾有取焉。迺貽爾銘。揭置座右。與臥以之。之死毋撓。

趙彥僉介庵銘

書名之學。有會其意。維介于文。分而爲二。在人進修。是曰利器。以別正邪。以判義利。由辨之明。守則不貳。既固既安。于石不啻。彼百世師。謂和之至。而能凜然。不可易志。由擇之精。知得非義。於乎我友。斯語之事。毋奪爾真。毋昧爾智。惠何人哉。希之則是。

王詠省吾齋銘

大賢省身。三事而已。至于吾儕。又奚止此。隨事默察。日夜以思。約之又約。乃至于斯。維曾入聖。以是爲主。我友希之。請事斯語。

宋捷如心堂銘

心涵太虛。萬古惟一。全體大用。存乎神易。同人之先。中直本同。復觀諸戚。我感彼通。求心之道。莫尚比擬。以己況人。夫豈有異。昧者弗察。曾不善維。一膜之外。癢痾莫知。忠中恕如。本自倉頡。先覺闡祕。精義斯抉。

宋叟之堂高叟銘之。尙衣斯言終身行之。

贊

王司封眞贊

鞠躬履力擇地而行。在漢宜鄉。今有先生。四海符谿。先生其甥。我瞻儀形。鄙倍其萌。

趙卯發集孟四箴贊

我讀七篇。有見于恥。終身行之。未測其泚。趙子作箴。其目有四。孝敬善利。貴賤譽毀。浩乎博哉。精義妙旨。知之實難。行亦匪易。維是四者。有源有委。升高自下。適遠從邇。充爾知能。擇爾塗軌。窮達好惡。皆外物耳。願循其序。默察眞履。致致要歸。一而已矣。我作斯贊。曰能則未。敢誦所聞。以諗同志。

雜著

客問

客有問于高子曰。昔揚子雲。爲官拓落。而取嘲于人。韓退之。投閒置散。而貽笑于士。皆爲文以解之。今子坐廢八年。憔悴頓踣。甚于二子。無一言自解。不已屈乎。高子莞然笑曰。若何言之陋。二子慕君不得。熱中有言。世稱其文之奇。予獨憐其志之卑也。子爲我願之乎。自古不得志者。莫若孔孟。直道取困。死而無悔。其言曰。天之將喪斯文也。後死者不得與于斯文也。曰。夫欲平治天下。當今之世。舍我其誰也。以天自斷。而未嘗以說人。孔孟之不師。而揚韓之慕。若何言之陋也。客曰。非此之謂也。自東方先生以來。文人才士。

落落于時。未有不因筆墨以自見。非特揚韓爲然。今子不足于文。姑自託于聖賢。爲大言以欺我。高則高矣。而終未免于拙之誚也。高子曰。嘻。客之要我若是。予何愛于言。然非恥于拙而動于激。特欲客知予平生之相遇也。自嘉熙以來。予用于時者四。絀于時者六。用我者曰文清李公。曰清獻杜公。曰丞相吳公。曰丞相董公。絀我者曰周坦。曰蕭泰來。曰朱熠。曰沈炎。曰章鑑。曰何夢然。十人者。其爲人賢不肖。皆非予所能知也。夫用于時則榮。絀于時則辱。天下之常理也。而好事者評予之用舍。乃皆以爲榮。予甚惑焉。求其說而不得。則彊以意揣之。曰。豈用我者法當惟其人。絀我者法當反其類。而今皆應法矣乎。夫使用我者。而出于開慶之大臣。絀我者。而出于端平之御史。則予之所懼也。嗚呼。繼自今以往。其復有知我如二清。吳董之倫矣乎。予不得而知也。其復有厄我如坦泰之徒矣乎。予亦不得而知也。使無二清。予則已矣。若猶有之。予雖老矣。安知其終不遇哉。如之何其勇于自絕而急于自解也。中庸曰。在下位。不援上。不怨天。不尤人。孟子曰。行有不得者。反求諸己而已矣。予將循念往愆。益求其所未至。以聽天之所處焉。苟徒嗟卑嘆老。哀窮愬屈。以自見于筆墨之間。此特文人所爲。而非聖賢用舍行藏之大法也。予非惟不能亦不暇。客矍然曰。吾以語言文字望子。而子以聖賢所爲自期。乃今日知所進矣。長揖而退。

客悼

恥堂居士歸自宣城。客有過之者。蹙額而言曰。子何歸之遽乎。吾觀一時人士。留落不耦。未有若子之甚者也。吾嘗計子之闕閱而知之。子之齒于仕版。且四十年矣。其在內服。起自史館。至於大蓬。其在外服。三

秉州麾。七乘使傳。歷位不爲不多也。然攷其實。則內不及五載。外不過六年。餘皆投閒置散之時也。子于等輩。不爲後人曷爲至此哉。居士笑而應之曰。客知其概。未知其詳也。試爲客言之。始子有位於朝。實與樞參季父同時。士之有求于季父者。往往津介于子。一日有扣門者。視之。謝公方叔也。時自列院出。爲湖南賓客。意不自得。予言之季父。季父未及薦進也。俄而自致冠豸矣。又一日有扣門者。視之。趙公與澤也。時未脫選。予言之季父。季父立舉之。又一日有徒步衝雨而來者。予視之。姚公希得也。時自奏邸出。倅當塗。太守鄧泳。拒其來。予言之季父。季父言之時相。易倅他郡。十餘年。子自少蓬得罪去。而牟公子才爲從官。屬士爭出其門。一日趙公曰。趙自淮東遺予書。予素才之。薦于牟公。云此人善議論。蜀人在列者莫能及也。聞者不悅。此四公者未遇時。予皆推轂焉。今一爲王。一爲相。一爲執政。一建大闢。而予猶夫人也。不特此爾。淳祐之季年。丞相吳公當國。一日而除一蓬。四著善類。舉手相賀。蓋予爲少蓬。牟公與徐景說。李純甫留漢輔。爲大小著。今自景說物故之外。一爲執政。一爲內相。一爲侍從。而予猶夫人也。官竊祕監之稱者。十有五年。職竊寶文之稱者。亦十有五年。予之落拓如此。豈特如客所云而已哉。而予之所以至此。予自知之。客未必知也。昔吾夫子于公冶長。南容。及史魚。蘧伯玉。皆比而言之。而辭氣有抑揚。其意若曰。長之得罪。雖非自取。要不若南容之免于刑。魚之亢直。雖曰難能。要不若伯玉之爲君子。然則七公之所以達。以履南容伯玉之行。予之所以窮。以蹈公冶史魚之迹。而然也。然夫子所貴。在彼不在此。則優劣豈不較然異哉。然雖姑置容冶。而以蘧史論之。夫子所謂卷懷者。必其可懷之物也。故寶可得而懷。瑾可得

而懷。至于矢則豈可懷之哉。善乎龜山之說曰。史魚之如矢。雖欲卷而懷之。有不可得也。故魚雖不如伯玉。而稟之于天者。至死不變。聖人猶有取焉。予將挾魚之矢以終吾身。窮達得喪。何足道哉。于是客絕然慙曰。子之志如此。吾以常情測之。陋矣。詹尹。漁父。尙不足以知屈原。吾安能知子哉。乃悵然而去。

諭俗文

朝廷遣使者觀風一道。其責重矣。所以別自是非。采察善惡。獎厲忠信。懲革澆訛。耘耨強梗。伸達沈滯。使聖天子教化宣明。德澤流布。光輝燦然。著于所部。如皇華之光明于野。然後爲虛其職。豈俗吏所能辦哉。使者受命。來使閩中。始至。嘗下教。以爲上四方之俗。近于狠。下四州之俗。近于頑。非鄙夷爾民而待之薄也。蓋入境以來。所聞則然。是以明相告諭。庶幾能改。今八閱月于此矣。觀之認牒。固可概見。往往父子相殘。兄弟相賊。夫婦相棄。親戚相讎。較錙銖之財。而興訟。至歷數載。因纖芥之忿。而交愬。殆偏諸司。虛造事端。僞立契券。欺誣良善。瀆紊公私。泯泯焚焚。何所不有。吁。使吾民至此。非使者之罪乎。古之良吏。不事刑威。民服其教。至于人人有士君子之行。無他。身率以正而已。今使者德業無聞。行義不著。無以表倡。乃欲特區區政刑以相糾督。宜乎習俗之不厚。獄訟之日滋也。視周之使臣。相去萬萬。慙負職業如此。朝廷說以古法繩之。不陷大譴矣乎。今當春和。萬物更始。特述所愧。以諭爾民。其亦少相體悉。各務省循。毋長鬪頑。毋作姦僞。毋棄禮義。毋逆倫理。毋事鬪狠。毋恣侵漁。使里閭清靜。田野安生。四方之人。將曰閩中陶染諸先儒之風。今又服其使者之教如此。人之詆其頑狠者。妄也。夫如是。上下豈不並受其福哉。使者之言。

非飾美觀。非爲迂闊。爾民其審聽之。毋忽。

寧國府勸農文

太守下車。兩月有餘。風俗猶未周知。然大略亦可見矣。此邦士。讒民勸。好謗喜訟。太守欲諭教之。以積習久。未能也。茲歲二月。以令勸農。乃先進爾農而告之。太守。蜀人也。起田中。知農事爲詳。試爲父老言。蜀人治田之事。方春耕。作將興。父老集子弟而教之曰。田事起矣。一年之命。繫于此時。其毋飲博。毋訟詐。毋嬉遊。毋爭鬪。一意于耕。父兄之教。既先。子弟之聽。復謹。莫不盡力以布種。四月。草生。同阡共陌之人。通力合作。耘而去之。置漏以定其期。擊鼓以爲之節。怠者有罰。趨者有賞。及至盛夏。烈日如火。田水如湯。薈耨之苦。尤甚。農之就功。尤力。人事勤盡如此。故其熟也常倍。及來浙間。見浙人治田。比蜀中尤精。土膏既發。地力有餘。深耕熟耨。壤細如麩。故其種入土。堅緻而不疎。苗既茂矣。大暑之時。決去其水。使日曝之。固其根。名曰靠田。根既固矣。復車水入田。名曰還水。其勞如此。還水之後。苗日以盛。雖遇旱暵。可保無憂。其熟也。上田一畝。收五六石。故諺曰。蘇湖熟。天下足。雖其田之膏腴。亦由人力之盡也。太守始至。頗聞爾農治田。失之鹵莽。其始種也。耕之不熟。地力不盡。苗既殖矣。不耨不耕。稂莠並興。陂塘不修。圩堰不固。旱不知備。澇不知防。則又鬪狠鬪訟。以賄有司。避役頑輸。以取追逮。心力既分。不得專一。是以雖號樂土。連歲不登。由此故也。父老其歸。以太守言。諭告子弟。川浙與宣。風土雖殊。勤則得熟。怠則薄收。其理一也。雖然。尙有以告父老。夫水旱雖係天數。而感召則在人心。若使田里之間。父慈子孝。兄弟弟恭。鄰里輯睦。風俗純厚。

自然可以感召至和。風雨調節。災害不生。太守得與汝曹共享一土。爲太平民。豈不樂哉。父老其歸。丁寧子弟。明聽吾言。毋忽。

嚴州勸農文

太守奉詔書。撫百姓。今一年矣。生于蜀土。不能詳知汝州利害。然汝州至急之務。公私所甚憂者。太守雖愚。亦知之矣。豈非艱食之爲患乎。汝州山多田少。良田纔百二三。餘皆磽瘠。爾農盡力以耕。及冬斂藏。尙不足以餬口。常仰糴他郡。一遇閉遏。輒有溝壑之憂。太守雖大聲疾呼。告于臺闈。彼不顧也。爾農其可不力耕乎。去歲旱災。太守早夜焦勞。蠲租發廩。勸富人賑糶。白于朝。得米萬石。以助糶濟。自謂心力粗竭。然小惠安能徧也。今幸陰陽調和。臘雪春雨。率皆應候。天時旣順。人事可不勉乎。太守用出遠郊。進父老而告之。古語云。人情一日不再食。則飢。飢。火所驅。不顧廉恥。姦邪盜賊。皆由此起。欲其不飢。無他。勤于耕而已。欲耕之勤。去其害于耕者而已。汝州之人。喜與詞訴。在官日多。在野日少。耕能不廢乎。汝州之人。喜事鬼神。竭力費財。奔走道路。耕能不廢乎。好飲博。則心志荒。好嬉遊。則本業墮。若能去此四害。惟專惟勤。田之無收。吾不信也。父老皆深知田者。毋謂太守之言常談。歸語子孫。明聽力行。毋忽。

福建運司勸農文

舉天下之田。皆不可不熟。而福建之田。尤不可以不熟。舉天下之民。皆不可使飢。而福建之民。尤不可以使之飢。何則。歲歉生事。此方爲甚故也。古人有言。飢不得食。雖慈母不能保其子。然則歲歉生事。豈爾民

之得已哉。近年以來。時和歲豐。上下粗給。部中無犬吠之警。使者之責。亦少寬矣。然嗣歲之憂。固未艾也。今幸陰陽順序。春雨沾足。太史所占。又主豐登。爾農正當上順天心。力修人事。使穀之入。歲多一歲。父母妻子。免于飢凍。姦邪賊亂。不得竊發。上下歡欣。相安于無事。豈不樂哉。使者又以耕之三害戒汝。其審聽之。捨本逐末。羣聚私販。犯法破家。此害耕之大者。喜與詞訴。伺候官府。奔走道路。次之。博奕飲酒。嬉遊無度。四體不勤。次之。苟能去此三者。父率其子。兄勉其弟。沾體塗足。一以耕種爲事。天道神明。報應不差。不以豐年賜汝。使者當任其咎。爾農毋謂常談忽之。

恥堂存稿卷六

五言古詩

暮春卽事

皇天列四運。懿茲暮春熙。和風著萬物。觀物令心怡。如何魏晉後。詞人總淒淒。退之頗知道。及此尤傷悲。甯非遭掩留。歎老還嗟卑。哀樂緣外感。安能識天時。不見魯中狂。陶然浴清沂。問渠樂何事。無言對春暉。人亡已千年。歎息將安歸。

次王秉純投贈三十韻

狂客寫孤憤。危詞難羣愴。秋菑露節角。春林掃穠纖。長缺刺橫鱗。寸鐵劖妖蟾。赤子臥橫草。蒼生捐蓋苦。無衣可自蔽。有突何由黔。洌泉浸苞稂。白露摧蒼蒹。念此心怛怛。因之淚漸漸。誰能坐捫舌。聊欲一奮髯。百憂不易窮。千篇猶未戩。生氣凜不懣。死灰驚復炎。敢云寡鶴唱。尙欲神龍潛。拾遺愛薛孟。謫仙重王閻。相邀共夜話。快讀臨風箴。吏闌聖頻折。樂極酒屢拈。國家正閒暇。上下方熙恬。賈誼枉流慟。桓侯笑鍼砭。無庸事吟諷。且復披湘縑。緬懷西方美。遐想虞庭僉。狂愚易構禍。譏刺徒招嫌。古出躬是瘁。戲言心如慙。且當阮籍醉。莫待申屠筓。及今不自悔。胡神將汝殲。之子七步才。時命三年淹。原註時方下第江湖久放浪。齏鹽應輻壓。端如伏檻虎。更似緣竿鮎。賈藏玉有美。臺餽金無兼。我欲引自近。寒盟應重燭。弁山蕨可茹。若溪

鮑堪黏。諾金雖未墜。許劍已可覘。從今但洗耳。水程報郵籤。

送徐景說歸三衢

秋風吐商氣。庭樹感以飛。美人悼時節。去意不可羈。朋陰傲排盪。晨光弄熹微。靈修詎敢怨。浩蕩終難依。岐分蹈一失。決此存亡機。僵株擢新稊。倏忽成十圍。陽隕人所願。蒼天詎能違。蹇予于夫子。亮節深所希。取舍既共是。排擢亦同非。豈伊桐江上。裴回送將歸。時危抱深感。人遠傷遐睎。國家福未艾。祖宗臨孔威。願子崇明德。桑榆借光輝。

思耕亭有序

吾友王敏道。爲富陽稅官。廨近嚴子陵祠。築亭其旁。求名于子。攷諸前牒。富陽漢會稽富春縣。吳始分富春桐廬。先生耕釣之地。皆在富春。明矣。然今分隸二州。則在嚴者。宜以釣爲重。在杭者。當以耕取名。紹興間。鄭公剛中宣撫四川。作思耕亭。蓋以思孔明耕屯爲義。予蜀人也。習聞其號。乃借以名斯亭。因系之詩。致懷賢之意云。

莘郊投耒興。六百奠殷祀。南陽輟耰出。漢業債還起。聖賢憂世心。秋月照寒水。彼哉植杖徒。長往見何處。我讀逸氏傳。初訝子陵志。亦符餒方張。注想資共理。掉頭歸深山。繆洗巢父耳。六經凜刀尺。云乎不思畏。反復史氏詞。陵去良有以。維人驗進德。必于師友試。歷試猶夫人。成就安能偉。挽士亦既來。舍王甯得已。漢道汝不衡。先生可輕議。釣臺千萬篇。未有愜予意。賦詩題思耕。聊與發斯義。

觴客海棠下。以東坡絲絲紅萼是鄉人之句分韻。予得絲字。

南國候傷早。東皇駕如馳。月正未強半。紅紫皆離披。蜀花異凡品。作態能矜持。可憐多迫蹴。竟隨羣卉移。如彼市門女。狼籍施胭脂。又如賤錦工。忙擲梭中絲。匆匆不耐看。欲速將何爲。碧雞有佳人。睡足晨妝遲。含恻自愛惜。肯受春風欺。思之不可見。感事腸生悲。

爲溫樂堂五綠亭解嘲

園林非不佳。名字著難穩。稍與流俗異。譏呵來噂噂。我堂名溫樂。竊慕涑水翁。我亭名五綠。又希午橋公。客來笑不已。謂我何其鄙。拳拳二相國。所愛人爵耳。聞之爲一哈。爭端自予開。嗟予信鄙矣。笑客亦愚哉。相誠吾所愛。何必裴與馬。唐非無李盧。宋何有章蔡。爾知相何物。是謂聖賢宅。士而不爲此。何以下膏澤。孟軻出書意。宣尼載質心。溫豈獨甘樂。裴非錮園林。二扁有深意。客詎窺其浚。吾言豈狂言。刀尺自孔氏。

題黃巖蔡氏青在亭

逢人說愛山。誰何是真愛。苟無丘壑情。在眼猶不在。君看終南客。豈不臥輿對。奈何心自盲。坐失烟霞態。蔡侯故靜者。肯與青山背。作堂老其間。列岫儼襟帶。蘿月散庭隅。白雲屯戶外。疏櫺納遙碧。平几挹橫黛。青山信在茲。心鏡雨融會。豈效逋客徒。匿情給松檜。咨余秉微尚。頗亦厭塵瑤。幸君分半青。著我函丈對。遊巾山得晴字。

巾山何亭亭。拔地蹲中城。蒼龍擢雙角。盤空鬪孤撐。崇雉儼環抱。兼如在滌牲。有時霽霧舉。插我堂東榮。

雖勞拄笏望，猶除杖藜行。值茲陽和候，鮮暉吐新晴。擺去纒牽累，少暢窺臨情。藉蘭得勝引，共此酒一盛。味餘百憂集，樂極萬感生。去國魂難招，懷人涕易盈。雖無丘壑姿，宿昔芥塵纓。寄言山中叟，未慕同幽貞。

次韻徐景說見寄併呈牟存叟

東南有華屋，結構清江濱。規樞百年遠，庭宇無纖氛。前林藪杞梓，後圃植蘭蓀。嘉賓日還往，門戶生精魂。雖慚北第壯，猶能植乾坤。主人遺後意，豈欲徒飽溫。相期大此屋，傳世垂無垠。人事一朝異，祖訓成仇冤。姦隸竊其柄，良朋中路捐。殖貨以自封，顧笑以爲慳。耳目就聾塞，誰其與忠言。不念乃祖心，望爾椒聊蕃。感激當世事，家國初無分。宗子誤置相，匪人轉洪鈞。揮善樹羣慝，瘡國開亂原。權豪競叨憤，赤子愁吟呻。我室既盡毀，大盜將起吞。藐焉蟻蝨臣，埋輪承誤恩。睨冀不能擊，狐狸加霆震。撫己方自慙，顧指爲尤愆。百壬妄見猜，欲取棋枰鬮。誰知孤臣心，但求王室安。舉目百嫫中，莫若二子妍。願識徑阪徑，更認存齋存。歲晚定三友，短羽追孤鶩。

迓杜丞相艤舟白鶴山下有感

維舟候新鉞，薄言憩茲山。叢祠倚層阜，迴阡俯澄灣。竚立心目瞿，白鶴懸榜顏。嘉名契舊隱，身疑墮其間。杳嶂森古木，荒塗翳枯菅。田空少鴻雁，谷腥富豺獍。更懷山中人，騎鶴去不還。平生抱炯介，轉張困羣姦。徂謝易永久，十年闕松關。紛吾信虛薄，宿昔蒙砭頑。及茲落海嶠，初心汨憂患。竭來因見召，感涕淒其潸。亦欲蔭青茆，賞心諒難攀。孤憤竟何及，顛毛自令蠱。

龜溪卽事五首

頑雲茆鶴嶺，積雪明龜溪。枌榆社已屋，斯焉卜幽棲。亦有好事人，除館溪之西。門巷寄深窈，青山有攀躋。平生秉微尚，頗忻詠歸兮。且可投吾簪，安能棲會稽。原註：史嵩之以冬雷封事見逐，改予越俸不赴。

父兄吳下宅，師友茗溪磯。亦欲從之遊，煦濕相因依。睽孤諒無樂，旅瑣良可唏。古來遯世士，獨立取衆非。

杏子匪能然，翼短難高飛。懷哉訂頑翁，示我真指歸。

王庭陟峻茂，三年蝨其間。愚忠竟何補，積咎成丘山。媿彼海上鷗，臨機馭其翻。案：原本有闕文，嗟嗟亦胡顏。汝

今尚無覺，復倚榮辱關。晨門獨何人，永原案以下原本闕

二疏仕漢庭，才術相頡頏。並傳已去寵，同歸更輝光。蹇予與季父，硯硤而琳琅。不才自宜汰，顯斥庸何傷。

處我嫌疑間，斯義安所當。宣聖譏鄰醯，焉廋渠肺腸。原註：嵩之謂叔姪同朝有嫌。

巖從太史氏，論次金匱書。龍興渡江後，塵止今皇初。微辭記當時，隻字甯敢虛。彼阿者誰子，顧欲私毀譽。

陽秋記慕容，史記名山儲。二子亦過計，人心焉可誣。原註：甯宗帝紀之末，嵩之妄加毀譽于理宗濟邸，改予所草。

送不浮弟歸金陵

分袂四百句，盍簪三十日。君來一何遲，君去一何疾。題彼原上鶴，飛鳴不相失。奈何緣薄宦，參辰各方一。

我鬚盡成絲，君紉纒如栗。人生幾相見，歲月去如斥。兩蘇欠同歸，二陸事堪慄。天倫盎中齋，富貴劍頭蜜。

岷下饒蹲鷗，吳中富仙朮。縱不死同丘，其可生異室。願君解龜後，休汝毋他適。建業水易茲，武昌魚多乙。

原註不浮昇
鄂皆有屋 急來共藜羹。蔭此青林密。春風棣華開。溪頭望歸鷁。

不浮次韻予亦再賦

齊余運頽侵。非復少年日。嵇康既習懶。長卿又嬰疾。避客如避仇。俗子意多失。獨于聲氣同。迹兩心事一。樛飯盤菹芹。濁酒籩撰粟。家食雖清貧。尙有幣餘斥。每思世路巖。身不寒而慄。何如掩關臥。黑甜過崖蜜。覺來荷長鏡。藥圃斷芝朮。末路值令弟。自遠造餘室。未久欲思歸。依人似高適。飛飛羽差池。秋雁避春乙。可憐陸士衡。嗚咽送親密。橈音轉回塘。無由望文鷁。

讀謝章奏疏賦朝陽吟

岷峨秃如赭。江漢濁如汙。云何只隔夜。潑黛接青藍。得非氣沆碣。祝融困西戡。秋風抗手謝。天公吾敢貪。此邦舊崛奇。神氣虎耽耽。山爲萬仞高。水作千尺涵。爾來遽一變。風景殊不堪。月墮雞不晨。露警鶴猶鼾。長畢綬若若。脩緡府潭潭。坐令死瓦色。空濛亘西南。劃開卷阿奏。翠鳳鳴孤嵐。尹氏誰敢指。家父獨縱談。三十六峰下。有此奇偉男。戛摩參井餘。剗硤山川慙。予方感整緯。耳此距躍三。作歌爲賈勇。罪我如飴甘。

吏道

勞牽迫吏道。儻若洪磨拘。九春回塵土。一迹園林無。直此休沐暇。借我良知娛。殘梅謝衆卉。初柳黃僵株。四運巧相斥。流目悲榮枯。俯仰潺湲沫。惻耳彌驚吁。故山渺何在。漱石良辰徂。爲邦歲已基。宣城可歸與。執柯勿睨視。州有達士模。

物貴

一從泉法亂，郡野咸荒荒。片楮毋偏重，無子相低昂。姦人竊其權，百物因大翔。握薪重尋桂，尺魚貴河魴。我聞榮穀下，執法半毛詳。物物揭成價，大字懸康莊。膾鮑椎公肆，餅師聚官場。市易祖嘉問，均輸肖弘羊。尉羅四面布，搖手觸刑章。哀哉今之人，逢時何不祥。穀斛八錢漢，米斗三錢唐。安得生其時，鼓腹詠太康。

增賦

吾哀天寶後，刻剝窮錐刀。豆實不得喫，蕨賣輸官曹。原註並見詩史民生于斯時，生意如鴻毛。安知咸淳際，赤子滋咨磬。稅租責三倍，用野晨號咷。柔桑稊未茁，調帛已騷騷。驕兵飲釀鮮，黎民窄糠糟。九關虎豹守，哀籲愁天高。

桑貴有感

我老與時忤，十年守窮空。衣食相驅迫，遂師田舍翁。每當春蠶起，不敢怠微躬。晨興督家人，留心曲箔中。客寓無田園，專仰買桑供。豈謂桑陡貴，半路哀塗窮。三百變三千，十倍價何穹。家貲已典盡，厥費猶未充。乃知楮法壞，流毒刀兵同。蒼天此何人，血面訴難通。棄蠶滿阡谷，行當歌大東。豫憂兒女曹，凜冽當嚴風。我窮何足道，四海關吾胸。赤子已露立，視天猶夢夢。

切桑嘆

美哉爾郊道，風日清且熙。條桑紛冉冉，采蘩復祁祁。盛時不可再，亂世誠堪悲。守令旣闕儒，兇黠何紛披。

千林非無主。奪攘無子遺。白刃鬪原野。長叉守路垂。羸童擁樹泣。弱隸空籃歸。更憐貧家女。束手看蠶飢。爾蠶何不幸。生此叔季時。千筐與萬箔。委棄如京坻。昔聞花門亂。倒麥折桑枝。幸無風塵警。氣象胡爾爲。天門萬里遠。吾君那得知。恨無古膚使。觀風采吾詩。

次韻不浮問疾末章及蝗

臥疴連夏秋。爾來收藥喜。羣腴久嚼蠟。今始甘魴鯉。自非天矜憐。安得吉祥止。寄聲問何如。感此遠方弟。炯然憂愛心。諄諄見詞旨。兼餽藥籠珍。廢疾居然起。末章悼飛蝗。布陣長千里。那知自北來。今亦徧茗水。公田吏如虎。收拾無滯穗。訴傷服大刑。遑哀室如燬。古來此亂國。赤子先遭棄。北橋千萬倉。何翅敖洛時。一粒不肯捐。肯念飢由已。謹勿傳吾詩。隙間天虻記。

題錢可則芙蓉庵

我家雪山下。結茅幾度秋。一朝劫火燎。身墜江南州。相逢芙蓉君。感慨不能休。我今如喪狗。狂走長包羞。子幸成小築。廊巖可夷猶。何不學孔明。草廬傲王侯。何不學袁安。高臥絕行軸。鸚鵡恍入夢。猿鶴悽生愁。逋客亮非然。誰其執怨仇。山茅自高潔。得雪逾清修。三白待君足。毋爲垢氛留。

酒闌

世道日淪忽。涔淚夜中滋。客問子何傷。傷予士氣痿。不見齊魯閔。所爭在糟醅。我吻燥已久。幸歌韓奕詩。若遭禁酒國。曹擘爾何爲。一塵皇闕下。赤壁竟不支。雖云竟不支。主翁自憐之。騎虎不敢下。悲鳴亦可嗤。

朝廷盡君子。拄撐賴公師。似此好局面。諸生願扶持。尹京用老蔡。恐翻元祐規。斯言是耶非。識者當能知。啞鐘懸清廟。瘡虎伏路垂。此而爲君子。小人當謂誰。幣輕物痛躍。赤子命一絲。尙曰此元祐。天乎欲誰欺。醪粲恩誠深。報復機誠危。獨哀三百年。象此終何裨。咸幡不復舉。志士徒傷悲。

蜀酒

我辭相國歸。原註趙公葵遣我酒十器。拜受起濟然。爲上有蜀字。狐狸之所嗥。種秫甯有地。得非父兄血。或是鄉人淚。我飲不下咽。思廣相國賜。願得投岷江。咸使西南醉。

端午日觴客東湖。遇雨。移飲壽台樓。分韻待壁字。

玄暉東田遊。明遠東城歷。深心慕塵軌。湖舫擬觴客。零雨或尼之。輟策駢茲席。霽虹帶高岑。傾羲被迴陌。良知共遐晞。數陪竹林七。境恬微尙愜。賞勝幽懷適。懷沙事千載。舊憾猶能關。延首瞻樓顏。新愁渺難釋。原註新開杜丞相薨天問愧非才。且可浮大白。徙倚驚漏窮。晨宵挂東壁。

贈道士劉友鶴

韓林紛萬族。白鶴稱善鳴。標榜在詩易。斯義淵然精。子今自羽客。復慕胎僊名。烟燼吐奇訊。警露爭圓清。平臯播馨蘭。廣隰蔭芳苓。于焉事飛薄。安得有惡聲。聾俗詎知我。胡爲枉櫻情。帝鄉闊萬里。短羽無遐征。

讀哲宗長編

我于咸淳際。偶讀紹符編。昏氣塞宇宙。臨文深慨然。孽惇暴于虎。秦陵度如天。惇言一脫口。輒奉以周旋。

嘯呼盡頑兇。排斥咸忠賢。意偏覆轍蹈。時移善政還。音旋濟惡蔡元度。推波會子宣。紀綱耳目地。悉以私人專。其間如商英。牙吻尤呀然。神靈不可測。黨人得生全。矧乃崇觀後。於邑更堪言。孝弟堯舜道。禍反階中天。聖經豈誤人。無乃說用燕。孤臣淚迸血。後來其監旃。

近者昌言多出諸賢之後。有感一首。

吾觀唐虞時。輔佐多世胄。一時謀謨嘉。十世典刑舊。古道日以衰。象賢始不懋。近者梧桐鳴。多出芝蘭秀。杜李唱其前。原註杜清獻之子劉胡繼其後。原註劉侍御漢弼之子最後康樂公。原註謝瀆山卓出漢庭右。元氣倚迢續。疵國資匡救。起予氣爲增。感事眉復皺。彼出進士科。視此一何陋。但貪一束芻。甘作三緘味。真堪爲僕僮。尙敢矜廉茂。誰能持我詩。往爲披恂瞽。

生日自嘲

今朝出門去。路逢擲榆子。汝形何龍鍾。汝色何顛頽。人皆鑽當路。汝獨鑽故紙。故紙高泰山。不直一杯水。當路衆所趨。汝獨無一字。玉堂炳宮燭。金華曳絲履。珥筆立螭頭。屬車陪豹尾。世人共歆羨。汝乃獨掩鼻。七十不回頭。汝亦自苦耳。抗手謝少年。吾今將仕矣。

次韻俞揆縣尉見贈釣臺賦梅

嚴風摺繁圃。嘉卉難爲香。坐令衆芳林。直爲蕭艾鄉。妖紅與嫵紫。乘時鬪新妝。梅生處局外。嶢然綱衣裳。獨無摧折憂。一笑春洋洋。猶懷臭味感。苦口嗟難嘗。風人妙託物。予德慚菲涼。坡公詎爲役。涪翁可齊芳。

尙此短兵接。當君陣堂堂。

齒落

韓公四十五。已賦齒落詩。呀然頓崩弛。存者皆浮危。我今恰半百。衰暮固其時。一齒缺當門。撼其秋葉飛。感茲生有涯。撫枕中夜悲。伊人未聞道。文與百世期。吾今食粟耳。將隨野草萎。聖路千萬里。加鞭猶可遲。

次韻功遠兄惠詩見勞

平生聞父師。擇術明諾謬。豈不依德言。其奈根器弱。听庭開獸樽。坐聽諸臣咋。誰其酌嘗之。自牖勤納約。維時鶴山翁。鐵作元祐腳。振盪一以鳴。萬馬立皆卻。此老埋虎丘。自頃氣何索。徽音闕不嗣。吾儕得無忤。偶從鋒鏑餘。來被纓組縛。每懷季父風。自笑吾瘴惡。十駕希乘黃。其敢自菲薄。啾啾竟何裨。有如叢間爵。那知桓將軍。早已憚孫綽。歟彼韝上鷹。掣臂將汝攫。何不追冥鴻。幡然見幾作。會逢故人劉。危言取胎愕。原註劉起爲博士。輪對其偉。腥病忌雕胡。葢藜妬芳若。遂仇作俑人。意欲屏醫藥。原註予對班偶在劉前。亦及藜之故爾。樂哉餘不停。閒身頗堪著。寒谿靜可鑿。青山峯如削。未能及黎侯。且可棲晉鄂。憑誰共行藏。歸語故山鶴。

贈蜀僧欽師

天台招提藪。我常避其塵。夫豈無名緇。近賦終汗人。原註時觀寺之風頗盛。衲子來西州。見之獨情親。豈惟粉社意。亦喜叢林聲。欽公惜我去。索贈良殷勤。子道我弗學。安能淑而身。雖然第一義。儒釋曾何分。要踏石頭路。須還鐵腳根。

次韻李通甫賦中秋

秋容滿茗甌。天籟生菌閣。幽懷對蕭辰。意味更沖泊。招朋傾一盛。相與慰牢落。抵掌談世事。亦可資一噱。須臾白玉盤。高掛青綃幙。賞心與景會。喜極悲還作。渺然望西南。慨想舊猿鶴。豈無首丘情。歸去事耕鑿。奈何朝廷上。聚鐵方鑄錯。原註時余將入蜀棄置勿復道。洗盞更深酌。我老倦吟詩。無驚紀行樂。故人詩筒來。晨齋有鳴鶴。

送劉養源遊吳中

自我識松澗。于今二十年。原註浙西憲俞揆譬彼鴻與虬。薄霄而棲川。憶昔初見時。予客劉養源。邂逅一相遇。松澗稱其賢。塞子久騷屑。養源亦蕭然。攜家輦轂下。炊玉斗萬錢。貸粟監河侯。蓋爲生事牽。訪子苕之濱。欲學東方先。率然集吾地。求汲松澗泉。予謂子往矣。輟鱗今復鮮。杜陵送李君。南入黔中天。應爲沂公醉。剩操雲嶠篇。

次韻不浮和東坡端午遊真如寺

君居秣陵時。日夜書旁午。念我方投閒。遠方同甘苦。別來日月長。如髮不可數。弟兄兩浮萍。功名一炊黍。相逢飲佳節。小慰情悽楚。東坡舊公案。君房妙言語。乃翁滿腹書。一字不堪煮。晚歲膝上君。端能繼華祖。我已困屠龍。君應思畫虎。相期寸田耕。心亨無齟齬。

平生欲一遊金陵而不得。再用韻。簡不浮。

金陵帝王州。遺事多典午。我昔讀其書。撫卷輒淒苦。一時豪傑士。錯出可勝數。榮名既銷歇。陳迹付離黍。惟有東山翁。於今尙翹楚。我欲一訪之。千載同晤語。酒子白下酌。茗向鍾山煮。北道有主人。載酒思出祖。但畏傍人譏。率野非兕虎。此事從昔然。非予獨齟齬。

不浮欲卜居霽川而未決。再用韻趣之。

君如夏日槐。濃陰正亭午。我如秋渚蓮。心老味加苦。卜居旣未果。會面真堪數。二米同一稗。何時如秬黍。我今居異邦。一齊咻衆楚。出門無所詣。欲話誰晤語。盍念荆同生。母憂豆逢煮。急來共伏臘。相與續妣祖。昔人兄弟多。八龍及三虎。安有予二人。而堪長齟齬。

不浮弟攝興國守書趣其歸

自君攝富州。政聲達王畿。鄉邦大夫士。相率聯書馳。欲控江州督。版授俾真爲。羣來質于予。予則力止之。父兄本公論。彼反疑爲私。諸公悵然去。未免方輪擘。日者召書來。自言攝承基。駑馬戀短豆。或者能無識。累牘上尙書。願趣新侯來。白頭分趨幕。不敢求旌麾。開書喜見面。與我同肝脾。高安別未久。德進兄嗟咨。我今亦復然。坡穎真吾師。雖無逍遙堂。遲君同賦詩。已掃安樂窩。扁舟早來歸。

次韻王深道領客登翠屏

東皇趣歸旆。行色在隴麥。撫舊念易盈。咸逝憂難釋。謂春姑徐驅。爲我咏今夕。天涯浩漫漫。迷路那可索。林芳坐自銷。庭草已如積。南亭慨靈運。東園悲阮籍。咨余畏簡書。無路追羣屐。故知凝睇處。惟見嶮尖碧。

如叩欠宿願。入越成誤適。一笑命淥樽。人生匪金石。

題王茂悅郴州白水奇清園布也。原註瀑

靈區有異產。化國無潛珍。坡公論人物。我則賦奇清。壯哉此白水。誰其瀉青冥。薤藏富媪嗇。扶芻天公噴。霹靂起神物。黃凰擘巨靈。陽山得瀑谷。永嘉賴斧斤。乃知出世事。須待開物人。倒懸訝瑤池。吹立驚滄溟。千穗落曉境。萬仞垂天紳。清寒八山骨。霏霏潤人巾。腐廡爲瘦爽。草木皆堅貞。臞仙挹瓢飲。俗士湔塵纓。度堂匪秩讌。築館先儲英。函書靜秩秩。子佩來侏飢。清風灑溪像。古柏文翁庭。從容講道要。宛轉餘詩情。謫仙一派妙。休文八詠新。茲惟佳山水。我嘗駐騏驎。平湖尚蕪漫。絕境宜荆榛。按圖重慨歎。歲月今崢嶸。壯觀誇好句。窘步敬豐擘。聊以贈我友。無庸寄山神。

書室揭劉元城陳了齋像以自厲

我昔天台游。偶得陳公像。以公謫是邦。祠堂懸真相。尋執憲于衡。復得劉元城。以公子孫寓。家傳遺寫真。揭之書室內。朝夕得晤對。焉能爲之役。妄意他年配。劉公色貞堅。疾惇固宜然。陳公甚和易。排京乃敢言。惇京爲腐草。二公長不老。汝其擇于斯。庶以傳不朽。

次韻詹丞賀得祠

我生天地間。自笑一疣物。燕蝠爭晨暝。龍螭安伸屈。三度侶黃冠。十載謝丹絨。無學陪旃廈。無才演綸紵。農策恣幽探。午臆饒睡兀。平生正坐口。自使窮到骨。紛紛蝶爭春。悄悄蠖啖月。從來彭澤琴。不勝昭陽羯。

安有冷笑姿。可入豔陽節。積年幾穴牀。經旬不踰闌。時逐志和風。慣臥袁安雪。初無子公書。誰其項斯說。忽令管龍宮。傳聞從雁帛。還來弄香火。幸不廢書冊。偷閒容我輩。用世付時哲。鵬鷗各逍遙。何煩較優劣。

感事

太師百僚長。歷代皆有之。所用有賢否。邦以分安危。惟彼太公望。桓桓定周基。至於尹氏徒。甯逃小雅讖。漢唐姑勿論。我朝有元龜。潞公四朝老。德望鎮華夷。咄哉京檜佞。言之可歎歎。近者揚王庭。舉朝莫言非。文潞不可作。吾其誰與歸。

鬼瞰吟

相公不入府。卻走湖上宅。朝游廟堂上。暮作水雲客。公府爵羅張。別墅車轂擊。三日斂履朝。萬楫戈船疾。原註入朝以軍船涉四湖人以爲不祥畔官義和誅。離局春秋責。主寬置不問。士佞那敢斥。倡優湛夜宴。臺館窮晨策。華堂枕千巖。幽竈通百尺。知非晉公洞。故是伯有窟。蘧蘧夢蝶飛。冉冉長蛇出。原註大蛇出于其窟煩冤哭中夜。魍魎來白日。方期燕婉求。難拒幽明迫。天不相厥居。鬼乃瞰其室。不見霍氏亡。千妖日叢積。不見蔡京敗。萬怪無窟迹。持危豈顛墜。起穢宜蕩滌。君看韓家園。斜陽空寂歷。

次劉養源見寄二十韻

山寺傳好語。盈耳歡聲騰。側聞新天子。有意綏黎烝。金鷄肆大胥。民散蒙哀矜。詔書日夜下。合沓來凌兢。訪落首鮐背。導諫延龜朋。講習召遺席。輅車聘才能。官簿還故邸。孝思齊定陵。宛如春氣至。頓釋朝霜凝。

神龍妙噓雲。妖狐疑聽冰。維今萬批政。欲言何可勝。安得批肝血。排雲叫觚稜。崇蘭變成艾。春鳩化爲鷹。貪夫野外饜。善類風中燈。百千各自媚。兩如偏見憎。原註選詩事蹟兩如直盈庭蒼玉佩。絕響朱絃繩。願我聖明后。金臺擇先登。昭蘇聒聒聽。凌厲高高層。陰霾半夜駸。明月高衢升。吾儕老吠畝。鼓腹歌中興。齒髮已自料。息翅甘冥鵬。

要君

聖人戒要君。春秋罪同弑。推此無上心。將何所不至。近者兇相歸。決烈誰能比。羣愚感其跡。咸謂難奪志。老夫非聖人。固知決無是。或問何以知。答云非奧祕。豈有患失夫。能爲勇退事。未聞介推歸。留母以爲質。府中俱蕩析。般移到花卉。殿前卒二百。輦載填城市。都人虜其愚。家家失歡喜。謹言真不返。剝剝競彈指。朝士獨可憐。一朝失怙恃。聯章乞還相。留莽無少異。天王雖聖明。勉徇非得已。御前金字牌。一日數十置。冠蓋何紛紛。排日遣郎吏。端明奉璽書。侍郎傳睿旨。師王袖親批。祈懇流涕泗。相公臥愈堅。那肯東山起。陛下如迫臣。臣當還故里。羣使駭其言。連名奏天陛。安知夜半舟。已渡曹娥水。新亭候徒勞。劉裕已還第。狄誇度崑崙。李愬擒元濟。忍于君父前。用此軍中詭。一勞可永逸。所欲已稱遂。從今政事堂。深根且固蒂。願已愜臧孫。專當踰季氏。上蒼孔威神。那知從汝未。

五月

五月出師時。老臣抱憂懼。端筮問詹尹。願告吉凶故。卦得明夷終。驚愕不敢露。庸知三日後。日肯大可怖。

原註六月朔日有食之既天象與人占。眞如相對語。師出無寸功。敗書常踴路。世道復雲輪。當局委而去。更令水中楡。原註露義不鳧鳧擊槃露。原註故也押秋風日以高。吾未得死所。援筆識著辭。淚血滿襟素。原註明夷上六不明晦初登于天照四國也後入于地失則也應在德祐。一年正月痛哉。

次韻方泳道浙見寄

延首浙河外。浮氛翳青天。下有豺與豕。紛其集中田。況復直歲祲。蒿萊莽連阡。民流入他郡。百里無人烟。咨予黍觀風。七州命所懸。駐車問疾苦。入耳濟濟然。期令萬蒼黔。生意春無邊。一網獵羣孽。其敢諉力綿。天王自聖明。凝旒蔽其前。曰此何罪辜。而誣飲貪泉。奉使既不稱。還印歸民編。南隍可笑傲。雙溪恣流連。不食金門步。不慕東壁纒。但願紫皇寤。赤子逃烹煎。賢聚國脈壯。吏良民瘼痊。臣雖就九死。沒齒無怨言。方子遠投贈。厲我彌貞堅。枯木已無心。安能被朱絃。江水倘可楫。吾其劍西川。

次韻王深道見寄

虛齋隱几坐。憂思來萬端。我帶舊盈箬。忽復數孔寬。追思昔迷復。驅馳困塵鞍。終蹈世塗險。衽席生瀧灘。本生仗忠信。意若無驚湍。雖有被野羅。何纂凌風翰。餐憂抱耿耿。進退良獨難。亦欲紉蕙茝。殷勤奉所歡。原註終疑辭居州。一暴難勝寒。衆陰日夜長。正氣日以單。國枋落熏腐。民生困貪殘。言路久榛棘。原註肉食成空餐。塞予宿嗜好。與世殊鹹酸。奈何不自愛。當門植芳蘭。故效五柳君。歸求容膝安。我友在天末。洞我腸與肝。新詩妙鑄發。字如湯銘盤。盍簪眇無因。東望慨其歎。遙聞病新愈。致我囊中丹。願君彊吞咀。

百年永相看。

次韻劉友鶴端午三首

昔經屈原坂。寒湍下悲鳴。又渡汨羅江。漘記曾輸誠。慨彼幽亂國。成此湘壘名。彫胡不受賦。滄子膳膏腥。離騷二十五。往往言其清。招汝千載後。來乎不來靈。桐江五月涼。波上搏層颺。傷屈念已愴。懷嚴瀨逾滋。維彼不逢世。如斯良遇時。懷沙與釣瀨。異節同光輝。故人去奚傷。宗國逃懼非。精義貴有質。聖遠咨從誰。箋天欲移病。心與孤鶴飛。苦青弁峯秀。遙首夢佳期。恬鱗慕深藻。倦翮懷安枝。焉能繫浮名。翬翔辰昇霏。已約東里伴。無煩北山移。他年倚礪門。望子蹠躄衣。

道中遇雨

車中覽書罷。舉頭失青山。五日無纖雲。春晴固應慳。須臾驟雨過。忽已羅青鬢。天公自知我。所遇無不安。奈何苦相戲。晦明翻覆間。浮雲雖暫收。未肯故山還。終當買不借。踐此泥塗艱。

送士深道赴荆門教授

蒼龍掛秋漢。涼風鼓吾袂。夜中不能寐。慷慨悲有餘。美人背我去。山川渺盤紆。平生嵇叔夜。龍性不可拘。以茲直諒益。弱念咸刊除。四海豈無交。誰爲真丈夫。溫蜀本兄弟。不過姓氏殊。臨分悄無言。執手空踟蹰。世事舉目知。安能共淪胥。君理江介榭。我念茗濱廬。後會難前期。且復立斯須。努力崇明德。歲寒盟可渝。

次韻北澗禪師留別

維北有深澗。其中貯幽泉。茲泥不可滓。萬境涵澄鮮。老人挹其流。濁世相周旋。清寒滌腴膩。八解不敢專。我來宿招提。踰月從金仙。解后澗瀨老。筆力回百川。參寥一以去。詩宗久無傳。阿師佩密印。絕後如光前。禪房竹色靜。秋深暑將闌。雙鬢儻入夢。寄予白雲篇。

中秋獨坐有感

三年三中秋。月作一樣奇。清貧不設客。老倦不吟詩。今年更淒涼。兒孫鎖秋闈。獨坐南窗下。兀兀如孤熊。追思歡娛地。無如少壯時。尙記壬辰歲。鶴山靖州歸。八月十五夜。月華散前墀。諸父秋山閣。羣從幽芳池。賦詩各分韻。醉墨紛淋漓。鶴山讀我句。終夜相嗟咨。明朝操紙來。傾倒里中兒。一往三十載。坐念心生悲。前輩已彫謝。諸兄亦無遺。奇孤一身在。流落天之涯。明月如昨日。而我鬢成絲。天人固異分。何煩涕交頤。又中秋分韻得處字

西風滌殘煥。秋水靜如濾。客心悲未央。感茲年芳去。聊攜池上酌。相與豁煩慮。我殺楚以陳。曾未舉前箸。延首視太清。飛娥已來御。屏翳雖放紛。不敢捩眼覷。清輝豈不佳。祗益畸人苦。故鄉值良辰。輒與親暱醺。轉蓬隨天風。異縣不可據。明年看清光。那知又何處。

自敘六十韻

蒼蒼大峩山。高標致青天。西江走其下。東井纏其顛。積此二儀氣。鍾爲萬古賢。粵從揚馬來。作者接項肩。

我家高陽氏。邃古已嬋媿。爰及開府公。世德乃昭宣。挺生六男子。如鼇海上連。逢時供世用。報國或驅捐。

原註九忠襄公二季。遇明主。皇極佐後先。英芬播家國。餘輝照山川。咨予食舊德。一綫千鈞懸。結髮日礪砥。植節

岡貞堅。龍飛四十春。先皇始招延。絳侯正驕主。答策聊相鐫。無心得天下。人力何有焉。有司矜其愚。置之

龜列前。先人既死城。案原本遭禍愈挺。挈身歸君父。叨沐登史筵。是時嘉熙末。大臣私自便。抗疏警其偷。

側目尤讒言。原註喬未幾孽蒿來。當國恣且專。白發並相議。原註庚子一斥踰三年。祁公俄入相。招我亦

城邊。公薨薨于位。游老司陶甄。蓄縮多畏忌。百壬鬧煎煎。汲黯又妄發。羣胤益呀喧。臥家百餘日。遂棹嚴

灘船。偶乘浙東傳。入手理輪權。南牀有婦翁。出柙流饑涎。劾章格不下。使者反歸田。流落經七載。那復凌

翔鷁。淳祐更化瑟。弓旌羅八纒。例叨赤車使。收召湘江壩。南宮甫踰月。遂玷蓬萊仙。仍侍玉皇案。兼操金

匱篇。主恩海嶽比。每欲輸塵涓。謝吳對持鉉。國勢如舟偏。薰蕕共一器。兩黨操戈鋌。予與趙徐輩。放逐紛

聯翩。吳公亦去相。國事堪濟然。荏苒兵難作。天怒誅凶全。吳公再秉鈞。首議賈生篇。諸梁尙當路。原註沈炎公

願竟以愆。亡何事大異。萊國冤南遷。國忠亂天經。黨禍何連延。傷哉淳祐士。蕭艾化蘭荃。腰金空照地。噤

如秋後蟬。嗟我亦何人。趙璧乃獨全。挂舌坐林間。憂憂歎無眠。一旦彗星出。應詔言數千。歷數蔡京罪。請

收買充權。書遇不得上。龍髯已飛天。尙有聞戒集。祕之未敢傳。其間朝陽吟。好事達湖弦。幾欲齒姦鉞。終

虞隕深淵。偃蹇踰十載。冰山尙頑堅。不學李拾遺。盡付酒家錢。不學杜拾遺。窮愁詩自纏。聖涯浩無際。前

路渺以綿。且復繫寸景。終予屣草編。案此詩復用篤延全權堅。天纏等韻蓋失之不及檢。

池荷就衰有感

雙池萬荷花。姣好欺子都。秋風一披拂。槁悴如三閭。子有君子操。昔人所歎譽。奈何不自奮。俛仰悲榮枯。荷花不能言。請以意對吾。兩間草木蕃。萬象粲以舒。一從鸚鵡鳴。荃蕙首見疎。況我值未運。忽忽良辰徂。相隨就衰叔。容色何能愉。抗手謝荷花。子誠志士模。嬰胗悼季世。箕千感淪胥。春陵大中正。所品良非虛。

九日分韻得花字

秋日何烈烈。憂心在丘麻。老圃跬步間。無惊問黃花。及茲九九候。清樽暢幽遐。朋簪既肅穆。宴豆亦靜嘉。風雨知蕭辰。颯然掠臆紗。喬松助聲勢。轟厖掉狂車。萸囊頓精神。似與老守誇。淵明有三徑。我獨歸無家。浮騖竟安適。佇立空咨嗟。

學詩

燕說談古書。六籍無詩如。彼序鬼一車。毛鄭賁其須。古今幾大儒。亦復鼓應桴。歷年二千餘。耳目爲所驅。卓哉紫陽朱。訂頑砭其愚。俗說力掃除。沙沈得簡珠。士惑真難祛。于今道猶孤。高叟一鄙夫。服膺與世殊。在天懸方諸。如聞歎起予。

讀書

問翁幾何年。翁年七十餘。尙作蠹書蟲。嗟翁一何愚。旋增通典缺。旋修阜陵書。毫芒集閱盡。白編還卷舒。五詩諷破底。原註選李杜韓蘇柳集誦日晡。玩物能喪志。聖賢言儼如。賦受有奇偏。誰能爲耘鋤。

讀荆軻傳

夜讀荆軻傳。掩卷喟然歎。結交天下士。賢哉太子丹。秋蓮孤劍寒。介紹田先生。得結荆卿歡。太子一語疑。先生甘自殘。荆卿欲藉手。臨事敢開口。走見樊於期。願借將軍首。將軍搯摩言。念此固已久。得復平生讐。性命何足有。四雄英烈風。精神凌白虹。函關初未入。氣已吞祖龍。其事雖不就。簡牘光無窮。奈何今之人。蹙縮如寒蟲。

九日會客面嶽亭。以采菊東籬下悠然見南山分韻得采字。

四運相摧斥。秋容忽而改。英英晚節花。含霜發鮮彩。游子感蕭辰。命侶登爽塏。湘山儼橫陳。秀色如有待。獨憐祝融峯。盡日埋鬢髮。安得誅雲師。吾將罪真宰。悠悠元亮心。千載宛如在。遙知把不盈。搔首終朝采。勝遂不可追。迷塗誰堪悔。棄置勿復談。且復澆磊砢。

謝鄭如晦餉酒

淵明久閒居。欲釀苦無秫。蕭條倚東籬。目斷杯中物。可人王荊州。白衣來扣寂。高情屬天雲。于今照方策。我窮交舊絕。門外無行迹。舊時如海腸。輟鮓等枯澀。誰憐東溟臣。西江分一滴。嗟哉子立賢。原註王子立子由之壻肯念黃州客。清酒冬百壺。昔酒夏千石。陶然北牕下。但覺天地窄。東西高雖異。南北鄭能一。感荷吾子德。酬報乏珪璧。但誦昌黎詩。以謝鄭羣錫。原註昌黎謝鄭羣錫贈簞詩明珠青玉不足報贈子相好無時衰

恥堂存稿卷七

七言古詩

題天台夏肯甫曉山亭詩

謝公晨策花崖登，杜陵早起開前林。徽之朝挹西山爽，退之曉望南山稜。古人看山自有候，箇中意味誰探尋。林霏夕斂羣動息，澤氣宵上英雲蒸。不于此際毓神秀，安得向曙嵐光凝。平生苦不識夜氣，見山忽得鄙人心。卷書默坐會有得，此起文字能摹臨。斯亭題扁有咀嚼，慎勿只遣供閒吟。直須敲破第一義，庶幾山鬼逢知音。

題趙致道茅齋

三百年前茅屋歌，誰其繼者茅齋銘。杜陵憂世何其切，鶴山觀物何其精。兩詩妙處均不朽，吾能合異融其真。綺櫳雕宇貯豪士，此豈有意矜吾民。從來大庇天下手，乃在茅棟茨檐人。請君觀銘驗吾德，復來歌義充吾仁。庶幾體用歸一貫，二老可作當欣欣。

五月六日約諸友遊北山舟已具而予偶不能出諸友和坡公法華寺詩亦賦一首

區中無由舒眼界，欲上雲峯觀九派。頗聞黃龍擅奇特，儻得窺臨真一快。清茗一綫僅委蛇，具區萬頃何滂湃。又聞法華兩招提，清曠奩絕人境隘。池光激灩鏡無臺，山色清寒身不壞。石林幻出玉玲瓏，萬虎千

巖斷雄怪，幽貞叶策。天相之梅，雨初晴白日曬。州家幸肯借官船，亟饌魚蝦菹菲蔬。奈何欲往竟不諧，徒羨諸公脫天械。歸來爭發古錦囊，令予伎癢如爬疥。嵇康本自不羈人，況復時屯方翻鑿。終當于此結菁茅，庶可償渠猿鶴債。

劉友鶴以詩贈別，次韻送之。

昔披朝霞尋洞天，五峯蠹漢高巒岘。靈君營魄去千歲，秋桂春蘿空鎖寒。古心未死不忍去，搖搖風蘿空中懸。五年失脚墮時網，夢思重到無由緣。竭來出守山水郡，公餘頗得窮幽元。丹丘仙客舊心賞，騎鶴過之同晤言。詩妍青林華韡韡，氣老幽澗松桓桓。問余君土信奇絕，孰與吾山多紫烟。桐江縉魚炯志節，緜山笙鶴誇神仙。能衡鐵炭識輕重，衆山部婁真如拳。羽人聞此深領會，笑指雙臺催棹船。題詩莫作世間語，會有剋剔青苔看。

時雪應禱，周子車和東坡所次柳子玉韻見貽，用韻答賦。

大冬愆陽人久渴，井泥無泉百川竭。老天有意濡沫之，一夜幻成三尺雪。勿嘲見卵索時夜，在眼來牟疑彷彿。塞子詎敢貪天功，片片無非后皇德。由來此物貴臘前，況復霏霏當暢月。坡公守穎足風流，坐看斜飛詠愁絕。明朝亦欲踵前規，試與諸君相暖熱。

出其東門行。原註：刺郡守貪暴。

君不見會稽太守第五倫罷官潛去逃吏民，不知當時何所畏。乘船夜渡曹娥津，只緣惠愛入人髓。攀車

叩馬千萬羣。使君若不行詭道。愛河浩渺難抽身。舊聞吳興解郡綬。歸路南指朝天京。爾來史項後先去。云何卻出東城園。原註史越翁項公澤皆食暴橫山伺候不知數。原註橫山南路小聚落攜壺挈榼相邀迎。使君自揣非壽我。西子不潔將汗人。水軍二百耀南路。三更一舸臨湖門。會稽吳興迹相似。誰知愛惡殊其情。畏匡戒薛聖賢有。豈比汝曹祇自焚。嗟哉後人亦盍此。慎勿繼踵成三人。從今要辨守賢否。只觀去路東南分。

禹栢行

往年上視會。凌空禹穴曾得窺。今年浮沅湘。又見禹栢躡山陂。茫茫禹迹遍天下。獨此二物稱神奇。凌雲意氣銷鑠盡。根心就化空存皮。樛柯入地枯不死。反更上擢青銅枝。被以九龍名。流傳自何時。得非木宿蒼龍精。儲英萃異成雄奇。頭角崔嵬訝撐拄。牙鬚磔裂相紛披。孔明廟栢信稱古。上距何翅千年奇。杜陵品藻一何陋。遺落鼻祖收孫枝。諉云此地不身到。何由得集衡湘詩。嗚呼衡之山巍巍。湘之水瀾瀾。地氣何太偏。獨于草木乎鍾之。柏兮手植自神禹。竹也種傳由舜妃。誰能爲天兮此界。人物庶幾可使悍俗歸風移。

題活谿寺

春陵太守真如奇。結茅肥遯湘江湄。三吾出意作新字。脫略蒼籀遺冰斯。溪山于我本何有。占斷不許傍人窺。人生天地遠。行客戀身外。物庸非癡。漫郎仙去五百載。名字永與茲山垂。要知忠義不磨處。雖不自與人與之。至今過者望卷石。森然魄動中興碑。此公何用專壑鄙。世上甯有爭墩兒。我來訪古制蓬蓽。悵

然不識亭臺基。掃出蟬噪發斯義。元子可作然吾詩。

次韻王深道寄題其弟敏道菊山

黃花有鑿能品人。俗士往往遭眼白。獨憐寂寞陶長宮。到死同盟不相釋。至今采采東籬詩。千載晶光猶陸離。瓊人妙質久無記。羞對紛紛女曹兒。子今風塵走異縣。故山舉頭不可見。奈何友此隱逸花。三嗅幽香意中戀。我聞瀛壖足隄州。夢生八翼飛秋秋。不須苦覓菊山句。晚節相期拂衣去。

次韻不浮弟自金陵相過

老夫睡眼方昏花。夢中忽聞歌棣華。暮春逢此晴雨好。足慰飄零少陵老。知君重踏東華塵。先訪雪堂老師兄。大篇鏗鏘來扣寂。讀之宛如花萼集。花殘誰復倚欄干。黃鶴催歸呼子安。此花當屈第一指。徐娘風情猶可喜。詩成共賦豈厭多。惠連何不借羊何。原註君朋不來故云古來難并良與美。報答春光一盛旨。勿云數見恐不鮮。勿憂相煎豈其然。我今已信天行止。小馮當門乃吾意。一春花惱只顛狂。行樂最怕功名妨。杜牧尋春遲有悔。且須十口澆磊隗。

再次韻

神仙不求三朵花。顏色不求陰麗華。但願時清風日好。娛此無裘癡鈍老。花光雲錦柳麴塵。買春不用孔方兄。正過寂寂還寂寂。有弟有弟遠方集。客來我常爲段干。長恐高臥驚袁安。踉蹌開門門措指。爲見阿同無量喜。阿同爾來新詩多。句法不減水部何。盎然醺人如酒美。夢回牙頰聞餘旨。我詩端如食小鮮。間

廁八珍徒赧然。掀髯浩歌不能止。酒酣一麾鐵如意。高樓搥碎謫仙狂。茫茫宇宙隘而妨。手捋虎鬚終不悔。謫仙與我如龔隗。

絕交行

男兒獨立天地間。太華絕尖一何陷。子房不肯下蕭曹。伯夷本自輕周召。往來舞袖拂雲霄。醉裏扁舟凌海嶠。鳳飢肯向雞求餐。玉潔不與蠅同調。山路斷。客來稀。日晏塵空臂爭掉。窮塗李白友俗人。歲晚杜甫交年少。前門長揖後門關。當面論心背面笑。雲門輕與凡耳彈。夜光莫怪兒童誚。君平世棄政自佳。老子知希渠所要。人間對面九疑峯。未許衝風鼓無竅。

物貴日甚

自從爲關以爲暴。物價何止相倍蓰。人生衣食爲大命。今已勦絕無餘遺。眞珠作襦錦作袴。白玉爲飯金爲糜。蒼天蒼天此何人。遭此大疾誰能醫。無食吾欲食其肉。無衣吾欲寢其皮。誰能爲我覆八溟。一洗世界無瘡痍。絲麻糞土被天下。菽麥水火調民飢。風后力牧不可起。吾輩碌碌安能追。

次韻徐景說贈安象祖

千仞岡頭孤鳳飛。翰林萬族驚且啼。桐江得樹一棲息。足以慰我飢渴思。飄然徑度爛柯去。再儀天陞來何時。子今追逐一何遠。所期不責平生知。獨慚託我非所任。泌水洋洋難療飢。夜光明月要人識。而我何知和與隋。端人擇友必有取。定交從此夫何疑。長安綠槐十二街。五都遊客爭奔馳。咄哉掉臂不肯住。來

同聖路乘堅肥。嗟余舊學荒已久。安能扣擊探玄機。世事舉目已可知。淹留此士終何爲。茗谿一曲攬歸夢。與子共賦臨流詩。

次韻劉養源見寄

咨余暮齒依蒲柳。見君無門慚九九。小臣久去孔鸞庭。大史曾供牛馬走。忽逢妖彗出不虞。天子驚惶下手書。孤忠泣血悼危亂。有詔不應心何如。一陽剝盡羣陰長。四向八荒俱痛癢。充庭溢序豈無人。借問何人真挺鯁。老夫空臆陳王前。語戇惟懼人抄傳。擒賊擒王真古語。肯于雞肋安尊拳。相如雖乏二千牘。自謂一言能報國。此腰堪斧尙不辭。更問世間閒禍福。但愁螻蟻宸居深。司馬門遠終浮湛。原註或謂予德音秩秩猶在耳。罪言殺士俄相尋。權威當朝底時節。不見朱雲攀檻折。弗于要處箴膏肓。毛舉萬端何屑屑。友鶴仙人當暮秋。詩來開卷風颼颼。句法森嚴何所自。丈夫冠冕垂前旒。淡交如君真耐久。何不來同一杯酒。期君他日孟浩然。男兒事業無窮年。

次韻王深道見寄

社驥屋鼠非難攻。我力如綿不能動。坐令墨吏彌奮張。氣湧如山高巖崑。天王聖明倖日月。跂望丹霄眦幾裂。孤忠耿耿達無路。獨抱幽香分蕪絕。諸偷恣睢方搖尾。忽報台州隨逝水。人不代天天代人。造物明威乃如此。嗟予粗不愧守官。繫有承君鑄志完。

次韻張壘見寄

掀髯一笑天地間。八代文衰誰爲起。夷陵丹砂空自光。中山老媿不可使。一從麥秀獲麟臺。三千餘載無文字。謫仙豈無希聖心。誰其起予二三子。張君忽贈白雲句。墨妙筆精真可喜。宗師奇澀費吟嘯。三讀方能得其意。奮髯蒼鼠色無冤。吐氣黑蛟雲可致。恨子初筵我旅酬。妙處安能爲標指。懼遭倚撫不哦詩。畏觸禍刑甯作史。翰林主人子墨卿。昔也同盟今趣異。不見當年聖德詩。猶被他人呼怪鬼。慚君問我乞餘丸。安得錦囊出懷裏。丈夫蓋棺事始定。斯文固應付後死。試問涪翁餘七言。松苔臭味固相似。

西湖競渡、遊人有蹂踐之厄。

杭州城西二月八。湖上處處笙歌發。行都士女出如雲。驂騑塞路車聯轄。龍舟競渡數千艘。紅旗綠棹紛相戛。有似昆明水戰時。石鯨秋風動鱗甲。抽釵脫釧解佩環。匝岸遊人爭賞設。平章家住葛山下。麗服明珠四羅列。喚船催入裏湖來。金錢百萬標竿揭。傾湖盆至人相登。萬衆崩騰遭踏殺。府門一旦尸如山。生者呻吟肱髀折。西湖自是天下景。何況遨頭古今歷。一時死者何足道。且得嘉話傳千葉。諫官御史門下士。九重天高誰敢說。溪翁聊爾作歌謠。謹勿傳抄取黥別。

三麗人行有序

杜子美作麗人行。譏丞相楊國忠也。國忠、貴妃之兄。近事有相似者。以蘇公有續麗人行。故作三麗人行。

麗人列屋芙蓉城。煙紅露綠千娉婷。朝回迎笑擁前後。忽遭唾棄嫌羶腥。汝曹面作死灰色。爭似平康坊

裏人。連眉倒鬢雙鷗鬢。臨春璧月陽臺雲。西湖喧天歌鼓鬧。列坐長筵來狎賓。紫衣中使天上至。黃封百
榼羅前庭。海螯江柱堆晶脆。猩唇熊白爭鮮新。微哉何曾食萬錢。陋矣楊家送八珍。酒酣自有娛客具。非
絲非竹非歌聲。呼盧一擲數百萬。劉毅酸寒何足陳。此時相公眼生纈。平康一笑華堂春。雞鳴鐘動卻歸
去。相公手自與金銀。恩纏愛結無與比。何意一朝遭怒噴。偶緣病起思破悶。亟遣花使傳丁甯。誰知青鳥
不解事。還報從人嬉水亭。立驅百騎掉而至。判司姓賈如弟兄。同遊七吏俱簿錄。一日得錢千萬緡。大書
明牒令湖曲。蘇提掃迹無蹄輪。風流宰相推第一。但恐稷契羞同倫。腥風雲霧塞宇宙。萬年遺臭何時泯。
要當壯士爲一洗。我老無力覆八溟。

次韻周子車喜雨

平生報國無才力。日夜只祈天雨粟。詎今歲事少差池。怪證誰云一而足。入春郡國多苦旱。起瞻四方何
蹙蹙。陋邦愚守介其間。造物私之意何篤。桑蠶有歲麥有秋。千里欣欣人足欲。爾來勤雨纔浹旬。日日眼
穿雲石觸。哀哉赤子命如綫。亟籲蒼穹求迸續。果然馬上天瓢翻。誰謂龍公慳一掬。吾儕所學自孔氏。頗
信此身兼位育。真能辦得一寸心。勺水固知焦可沃。君詩信美嫌太誇。只恐流傳辜自速。八荒延首待甘
霖。傅說誰其踵芳躅。

次韻雪寒郡中糶米養源有賦

父兮兒飢母兮寒。餅中無粟囊無錢。天公何不知人苦。瘳風裂膚雪塞戶。我來日月雖未多。舛令已干天

譴呵。醫瘡。眼下尙無藥。更有妙訣。瘳沈疴。拔貧爲富。非不窘。坐視溝瘠。吾何忍。長民要識天。之天。此事前
人固加謹。我倉我庾。雖甚枵。且須傾空。蘇瘵凋。慚無大德。與汝曹。聊以小惠。爲寬條。何時公私。俱露積。慰
我片片。心事赤。圻豐食。可接青黃。盜弭丸。無探赤白。老夫藉手。得歸田。免譏取禾。三百廩。君詩太誇。不可
傳。吾恐聞者。譏貪天。

莫特勢行

夜燈讀書史。標然撫予胷。奇哉天下士。英雄見略同。子長歎息。芋家事。謂勢于人。將有窮。謫仙作詩戒鯨
鯢。亦云勿恃風濤之勢。如白龍。乃知世上。夸毗子。控搏外物。終成空。君不見寡大夫。圍初得楚。章華臺前
汗成雨。鄭田周鼎。哆然求。齊桓晉文。何足數。一朝乾谿。萬衆潰。飢臥獨枕。涓入股。君不見夫。差稱霸。會黃
池。諸侯不敢。捩眼窺。臨盟爭長。莫敢拒。吳竟爲先。晉次之。中原甫歸。敗笠澤。甬東百家。慄可悲。君不見趙
家主父。尤雄強。吞滅代北。如驅羊。詐稱使者。入秦地。威風驚倒。秦昭王。暮年立子。一失計。探穀沙丘。終餓
亡。誦詩讀史。餘更披金匱。書章蔡與秦韓。往事尤可吁。悼欲族誅。元祐人。薦福鏤碑。立諸京。紹興五十三
家。槍掌股。慶元五十九人。僂牙齧。章蔡投荒。韓授首。秦亦奄。奄泉下人。當時氣勢。動山嶽。如今一窖。寒灰
塵。後來視今。猶視昔。哀哉踰路。雙轡傾。三書讀罷。燈亦暗。駒駒一枕。東方明。

次韻趙郎中興嘗泛舟之作

危樓傑山清。茗滌一眺蒼然。盡平楚。倚欄興盡。蘭橈舉。時聽長年作吳語。趙盾當權。人共苦。白蘋清風。渺

何處。人生得閒價無伍。天遣吾儕共休汝。公孫愛客茶屢煮。風味端能繼桑苧。晚涼一卮薦菹黍。清唱時聞采蓮女。紀茲勝踐須燕許。好與留題鎮烟嶼。吾詩老去渾漫與。不畏傳抄殫萬楮。

編局

舜爲天子臯爲士。瞽瞍殺人執而已。從來三尺天下平。析律二端真可鄙。近聞編局蕩巢穴。盡取鼠輩尸。諸市布衣韋帶三十餘。笞配黥流動千里。獨遺太學四五士。但以姦京法從事。秦相不重襲衣人。曷爲忠恕而已矣。乃知能掉三寸舌。極惡窮凶猶可恃。大理得臯陶。汝曹應頽泚。

官田行

噫呼嘻樂哉。咸淳三年之秋大有年。近自瀾河東西江與淮。遠及七閩二廣連四川。黃雲一望千萬里。莫辨東南西北阡。甌窶汗邪滿溝塍。秧馬折軸擔頰肩。天公更好事。十日不打雨。三邊不動塵。穡人更何慮。自從田歸官。百姓糟糠難。況復連年苦饑饉。草根木實爲珍饗。嗟餓殍骨橫千里。待得今年能者幾。只道伸眉得一笑。酒肉淋漓渾舍喜。誰知一粒不入腸。總是公家主家米。夜聞東家鄰。偃仰啼孤婢。我問汝爲誰。答云無食無兒窮婦人。今年公田分司官吏惡。那有遺秉滯穗霑飢貧。大家京坻那復有。惜米如珠藏。在困。我聞唐家天子卽位當四年。天下斗米惟三錢。不皇不減貞觀主。相公亦如房杜賢。奈何米價百倍。踰貞觀。此病豈得無其源。嗚呼噫嘻。我知之矣。自從買公田。豐年亦凶年。此何人哉。悠悠蒼天。更有一事尤堪怪。欲說未說心先怕。今年處處皆有秋。何故天台大水獨無一粒收。一粒不收猶自可。臣水王君火。

囚。此事頗關宗社憂。書生守經論白黑。無乃將身豺豕投。

讀陸達常簿奏篇喜而有賦。

老翁關門貪睡味。朝廷近事到耳疎。朝起忽收故舊信。得此痛哭流涕書。書中所道果何事。人心天命關機樞。昔無叛民今已起。赤子至此誰之辜。公田下損而上益。楮法子廢而母孤。三尺孤童盡知得。誰能暴虎編其須。朝陽一鳴百噴醒。幸哉僅有而絕無。三后在天甚神聖。佑此一脉皇基扶。我非慶歷石守道。聊題數語昭羣愚。

和劉養源

日景何須土圭測。臘盡熙熙好春色。明眉翠柳弄精神。調舌珍禽破岑寂。疊嶂融融遲日麗。雙溪渙渙層冰釋。行看騎簇昭亭曉。還聞猿嘯高齋夕。宛陵山澤紛紆餘。爾來憔悴緣急符。安得春風百萬斛。爲散和氣還郊墟。北帝回車已浸遠。東皇布令應潛孚。原疇蘇醒天雨玉。草木滋潤淵生珠。我詩背城猶借一吏氣。暫掃因元日。豫髮簿領還壓頭。不得時陪竹林七。若溪葦間舟延緣。白魚朱橘不論錢。幽棲已入五更夢。早春願洛何時煎。老師謹勿先抽單。苦嫌道院颼颼寒。吟編未載兩殼觥。莫惜娉婷珠一斛。

讀梅福傳有感原註因皇
子薨而作

君不見綏和天子在御世。五春畫堂甲觀寂。寂空無人豈無壯髮類。元帝奈燕飛來啄皇孫。三星屢暗紫宮裏。羣臣默默誰扣關。忽聞縣道上急變。乃是南昌梅子真。書言願蚤建三統。以孔子後上繼殷。存人自

立乃周武。墜人自塞爲亡秦。陛下若欲保繼嗣。成湯不祀宜留神。子真先曾柱王鳳。言不見省徒報聞。小臣讀史每流涕。福于異代猶諄諄。而況交柯紫荊樹。東枝顛賴西枝榮。有能建此第一義。本支百世何足云。我今那復效梅叟。聊欲全生吳市門。

記二首兒四日雷二異

咸淳七年正二月。天災人異何稠疊。細推厥咎端有繇。孤臣未言先泣血。日當丙子月當寅。原註正月十二月湖州毗山有妖孽。曹家產子威殺人。二首一身連骨節。左首似爹右似娘。渾舍驚走趾欲折。里胥不敢上其事。一州喧喧騰頰舌。從來天子天下首。二首之占何待說。我聞唐家儀鳳年的證端爲今日設。涇州之民有生兒。異幹同軀不容裂。是時武氏乘其夫。唐祚中微殆將滅。聖朝家法與唐異。四星在天循軌轍。咎在君陽非太陰。媧羿雖殊禍俱烈。人妖示變未三旬。二月天災來不輟。粵從己亥至壬寅。據歷雷聲未嘗發。胡爲碎匄震天鼓。四日四夜聲不絕。上天威怒端有意。要使吾君用剛決。夏竦姦邪致天變。仁皇感悟真明哲。只憑霹靂一聲雷。掃去有同湯沃雪。後來高廟遵故典。湯相罷歸同一訣。奈何災異過兩朝。猶復留此大饕餮。二首之兒四日雷。占雖不同應無別。作詩會入五行傳。謹勿流傳取剝削。

雞禍詩

君不見西漢初永光年。當時雞變禍連延。冠距名將尊已成。坐令戚里傾中天。那知千五百年後。咸淳之歲爲續絃。黑雞兩翅生五距。食輒傷人萬口傳。家雞盡縛向市賣。美味不敢登盤筵。皆云黑雞乃癸酉十

二相屬符昭然。生不于他獨于翅。蓋言羽翼爪距全。我欲攀龍報天公。無路可到明光宮。安得尸鄉祝雞翁。爲我用術禳其凶。天子九九八十一萬歲。免使真人白水還飛龍。

冬大雷電

方冬十月天炎蒸。雷公吼怒聲憑憑。投壺玉女忽大笑。晦明條燦來相乘。天方收聲地藏蟄。激怒豈爲陰所陵。圓蒼寓意端有在。要使強臣生戰兢。強臣聞之但一笑。小兒怖我終何能。白雞巨浸九齡亞。青鼠妖星千道稜。我猶視爾爲戲劇。此雷何啻蟲薨薨。聖君小變亦知懼。姦臣大異那能懲。寄語天公停此小伎倆。只須一聲霹靂王茂宏。

孤憤吟四十韻

原註效子
美對屬體

岷峨老人白頭哭。宇宙頻年生意蹙。自從解綬遠遁逃。日望君王戒危辱。幡然盡改亂亡事。斬新爲輯和平福。叢祠獵去嗥夜狐。遠嶽收取鳴陽族。閔籍惟供永巷埽。寶梁總向高閣束。上方月進絕前蹊。汙吏日攘行顯僂。賦租時爲率土蠲。恩澤尤當近畿足。聖心悔禍誠勇猛。天命何憂難迓續。老人靜中措眼看。時事轉覺令心寒。旄頭妖彗久不出。黔首剝肉殊未完。炎然凶渠氣脈壯。莆葵姦黨根株盤。小臣乘間肆邪論。原註陳伯玉衆正盈庭徒坐觀。北衙無人素爲地。南徼何路能通天。原註伯玉時謫首血淋漓誰困鄧。頭子勾追空憶韓。儀舜鳴周九苞鳳。溢序盈庭五彩鸞。若爲千載遭聖代。不肯一嘆驚朝端。得非盡善遇堯舜。毋庸賈直同箕子。我聞屋漏知在下。君欲箸籌煩暫借。尺籍無糧創市田。告身易醉空酬價。膏腹已被公家奪。磽

瘠復遭姦佃嚇。積庾如京甯復得。羸齒盈溝誰爲嘅。蚩尤兵革自久遠。新莽王田徒擾害。哀鴻慘淡集中澤。飢虎咆哮行曠野。柯山一闕猶未平。茗水三貪尤可怕。罔民白撰肯蠲除。括稅紅由恣姑嘔。城門口喚嚴酒榷。民屋寸量甚間架。瘠人封已信可誅。剝下媚上當何如。崔烈爲公近日有。劉毅答詔今時無。原註官事。民間已食烏味草。原註事。出長綱。天上猶積瓊林儲。小人長國但牟利。大學生財誰讀書。民貧盜起已有兆。內枝外甯猶貢諛。紛紛諂子諒無責。挺挺諸賢何不圖。芳草爲蕭晚節壞。嘉橘成枳中年渝。虞庭盛際枉者直。周屋衰時哲亦恐。漳濱病叟愁誰語。杜曲詩翁恍如晤。最憐稷契許身愚。豈謂陰何用心苦。每篇必寓憂世懷。直筆甯愁當國忤。法律森嚴信殊絕。對屬始終無齟齬。嗟予衰老才力弱。稽首名賢晨夕慕。憂來援筆偶成章。力戒負囊毋輒露。

送庸齋赴召

宋臣一去今三年。玉堂詔許還坡仙。黨魁久屈再徵用。識與不識皆歡顏。先生出處固有道。諸公進說徒嗽喧。或云時事正孔棘。百萬生靈皆倒懸。公卿唯阿固權位。闔戚盤互挈金錢。三垂蹙蹙迫寇壘。萬口嗽嗽愁實田。南交點寇謀幹腹。東海逆雛方聚船。奈何揖遜救焚溺。同姓體國甯其然。或云大老世模楷。晚節要同金石堅。不聞鳴犢反潛聖。況復白駒遺衆賢。濟川必待烝徒揖。傾否亦資茅茹連。試看醉翁門下士。當今誰者居清聯。角巾支杖亟還里。覽輝翔集毋輕前。我常靜慮爲折衷。咄此二議何其偏。卦爻時義各有當。聖賢出處無非天。五真應二秦可致。四不求初屯豈亨。要知君相誠與否。卓識諒已窮幾先。苟能

舉國聽夫子。雖不俟駕何尤焉。嚴風吹衣落閩土。幸與盟主相周旋。酒邊抵掌談世事。愛君憂國固拳拳。
鴻飛遵洛望不及。中夜起坐徒煩煎。心乎愛矣思有助。斐然狂簡成茲篇。原註：庸齋後辭不赴。

閒中讀書次第

紫陽禮編甫盡卷。亟償通典平生願。增損溫公鑑目成。原註：通鑑目錄有詳有略。要把二巖書貫穿。原註：巽巖長編終徽宗秀崑要錄。惟
高宗一朝。夜燈覽徹六一文。眉山鉅集思重見。七書卷帙二千餘。加我三年當閱徧。爾來兩目漸眵昏。一
一手鈔甯敢倦。固知衰頹力不勝。其奈嗜好頑難變。又恐貪多或溺心。閉閣時燒香一篆。

園中讀書

南樓幽簾雖粗適。猶嫌塵務妨閒逸。讀書老圃四無人。啼鳥落花春寂寂。試垂修綆汲義泉。更把長錢斷
玄窟。已無俗物敗人意。猶有睡魔入吾室。且須時擊看山脰。不妨暫著穿花屐。君平身世兩相棄。韓子老
大百無益。但願殘生更幾年。了我牀頭二三策。

恥堂存稿卷八

五言律

次韻養源避暑西湖

牆擁千竿竹。簾縈一種香。避喧情散朗。懷舊意悲涼。小簾琉璃色。新醅琥珀光。夢回聞剝啄。渾欲懶衣裳。

次韻戴石屏見寄

俊嶠詩人窟。夫君獨擅場。太羹無厚味。嘉稷有真香。投老安蓬戶。平生似草堂。原註戴詩頗近子美遙知道機熟。尊

酒百憂忘。

晚秋

颯颯晨飈凜。蕭蕭暝色淒。拒霜城上下。衰柳岸東西。老去慵青簡。憂來俯碧溪。飢烏誰教汝。故作傍人啼。

江夫人挽詩

悲哉金氏誌。未讀涕先零。祖統他宗嗣。嫠憂再世丁。天矜人一念。姑與婦三齡。原註夫人之姑張氏九十而終。夫人九十三而終。

幸有孫枝秀。翹然蔭戶庭。

病起二首

老去增書癖。還遭病見磨。杜詩能止癢。周易解祛魔。不得青編伴。惟應白日過。坐多膚欲痺。時起眺清波。

類面驚權出。梳頭感髮稀。鶴飢從自瘦。驥老更求肥。蕭索盤中饌。寬長身上衣。惟餘酒未減。興至羽觴飛。

鶴林吳尙書挽詩二首

珠緯躔奎後。坤文世載英。奇才冠元祐。大手擅端平。時事雖難并。詞華略與京。自從雙鳥寂。禁柳謾嚶鳴。魁孽奸時論。詞臣格詔除。承明俄罷直。光範肯馳書。東土淹靈運。南州哭仲舒。平生丞弼望。只此闕高墟。

吳參政淵挽詩三首

造化千年秀。皇家數世仁。功名光慶祐。人物輩乾淳。榮華旂常紀。睽睽鼎鼐新。愍留天不許。國步痛斯頻。中外踰三紀。勤勞備百爲。韓公飽經濟。杜杞困驅馳。風靜千屯祿。春回數路飢。江淮與襄漢。何地不豐碑。念昔先君子。慈恩託下陳。嵇孤雖願識。李御竟無因。賞遇肝腸照。書題骨肉親。數行知己淚。西望幾沾巾。

題林屋洞天

將返鷗夷棹。聊觀古洞天。蒼崖環谷口。圓嶠結湖壖。大藥慚無質。還丹莫浪傳。具區如弱水。重到定何年。

陳樞密宗禮挽詩二首

讀公淳寶疏。風節一何奇。凜凜戮丁刃。堂堂伐鄭師。良醫渠不使。傾廈故難支。不見陳攻蔡。當年亦右司。

原註謂陳瑩中宗禮去國亦右司。

直道終難恃。平生一險夷。蠻谿憔悴日。公府笑談時。來識魯山面。空看有道碑。雉膏殊未食。付與甯馨兒。

書事四首

晨炊出避寇。中夜尙傷弓。赤地眠枯枯。青天入短蓬。可憐窮白叟。所至聚黃童。老耳雖多聾。時聞話相公。坎瓌乾坤志。蒼茫宇宙身。十年猶鍛翮。尺澤豈遊鱗。汗簡時鑽蠹。斯文企獲麟。但憂來日少。滄海闊無津。不必緡金匱。何須校石渠。科條唐代典。刀尺漢人書。原註：予修通典之外。有漢刀尺論。四漢得失論。凡二十四卷。兵火失之。後世應知我。時人莫起予。祈天無厚望。更予十齡餘。

耽書

兩月竄荆棘。愁生祗自憐。屈盤茅屋底。擎踞野人前。盡室踰百指。看囊無一錢。長安望不見。何日靜戈鋌。年來得奇疾。彷彿似書淫。二史番休讀。原註：史記漢書。周而復始。三詩夢覺吟。原註：李杜蘇詩。枕間更誦。少時輕寸晷。老去惜分陰。只恐前生是。蓬山閣上蟬。

端午小飲分韻得身字

此節知何節。悲歡發興新。懷沙弔沈塚。高戶慶長身。豪氣今安在。忠魂死不泯。詠餘增感慨。命酒慰沾巾。立春日集杜句二首

春日垂霜鬢。江村亂水中。偷生長避地。愁坐正書空。乞米煩佳客。應門試小童。布衾冷如鐵。長夜豈堪終。早行石上水。泥濘苦相牽。盜賊浮生困。艱辛衆目憐。囊空罄金錯。米盡折花鈿。更有傷心處。君臣豺虎邊。

五言長律

存齋牟端明挽詩

碩德千人表。高風一世欽。師承文靖正。識拔秀巖深。奧學方前古。雄文獨擅今。史筵新發軔。儒館力抽簪。
蕭艾俄當路。蘅蘭竟出林。螭頭恩烏奕。豹尾步嶽岑。斷脛思金玉。圍腰肯待金。綬甘辭若若。戟喜對森森。
孽火遭千劫。讒波沸百千。燃臍機窈窕。原註董宋臣拔眼計謀陰。原註丁人全誣詆淵衷監。成蠲寵命臨。一麾猶偃蹇。
三節又侵尋。聽履星辰近。司綸雨露湛。世方期汲直。人已感遲任。披腹平生節。攀髯晚歲心。幅巾朝第就。遺腹暮庭歔。書殿榮封塚。玄臺闕在岑。鶴山初共被。茗水晚同襟。感舊鬚成雪。懷人涕作霖。元成負文采。端可副徽音。

鄒樞密應龍挽詩

有偉倫魁彥。風標九牧傾。直聲同日揭。峻節與霜明。賀旅羞權隸。佳兵折寇萌。一麾人共惜。再入道彌貞。
專對思尊主。塗歸首正名。終然疎汲黯。誰復挽陽城。訪落當元祀。干旄竝兩英。原註慶元元年與真西山魏鶴山同召驛車方稅鞅。局面已翻枰。不憚箋天苦。堅留出畫行。一言嬰虎怒。八載與鷗盟。原註鶴山補外上疏留行并得罪改瑟新元化。持樞贊國成。咎言方汹涌。悟主獨和平。南谷撩歸夢。東藩薄宦情。寒花馨晚節。潛穎謝浮榮。落落靈光殿。堂堂董相塋。國人歌輟忤。志士淚緣纓。隸也常尊孟。嗟哉未識荆。易名如得與。猶足慰平生。

讀天台侍郎黃公宜神道碑

昔纂甯宗紀。名臣嘆寂寥。鉅姦方枋國。多士謾盈朝。快讀黃公傳。如聞舜代詔。盡言醒衆曠。獨立聳清標。辨枉全張猛。持身簡豎刁。要途方凜凜。歸夢已搖搖。疏廣還家勇。義之入海遙。寒花矜晚節。老檜傲霜朝。

遷史雖猶缺。邕碑亦孔昭。咨予無健筆。魂去若爲招。

奏院像七弟挽詩

瑟瓚天資美。洪樞地胃華。安恬羞善宦。孝謹克承家。籀學耽奇古。文房好靜嘉。顏瓢空不繼。原粟散無涯。庭徑長生草。山園妙識花。公門捐造請。內典卻紛拏。留邸空陳迹。分麾付一嗟。原註：屢得郡皆不赴。陪蘭芳欲盡。池草句誰誇。甚欲號森柏。其如歎繫瓜。遙將萬行淚。灑向夕陽斜。

挽亡弟豫九制參詩

山園有佳樹。生處本同枝。客土何年異。孤根兩處移。西栽種嶺下。東植響溪湄。君壯方逢世。吾衰久忤時。丘園甘寂寞。門戶倚扶持。乘障能名著。參籌婉畫奇。平生境雖順。末路數終奇。屢厄梟鳴暴。仍遭馬蹏危。原註：馬光祖觀望拒其入幕。客魂翔寓里。旅櫬出京師。鴈澤羈孤影。鴿原躑躅悲。殫予暮光景。恤汝衆孤嫠。臨穴萬行淚。九原知不知。

七言律

谿亭春日二首

嚶嚶春沸擘青郊。老鶴翛然獨在臯。澹池和風眠五柳。冲融暖日醉三桃。盡輸樂事歸妍唱。肯把牢愁寄續騷。想得舊遊時入夢。西堂春草未應薶。

豈不懷歸蜀道難。故來谿上稅浮驂。新詩功次日遷九。潛聖儀刑畫接三。窗竹有情陪素隱。園花無賴恣

紅酣。要將雲淡風輕句。參請宗門老晦庵。

送胡吏部穎赴闕

榜榆陰裏植甘棠。民坐春風吏履霜。治粟久持膚使節。握蘭歸噴望郎香。去思應共湘江永。來諗誰云周道長。拖玉腰金君不羨。令民媵節看流芳。
郎省分攜恰五朞。相逢一笑楚江碕。釣魚山下人方到。回鴈峯頭客已歸。夜雨未厭揮塵柄。春風無奈趣鞍韉。臨岐但祝加餐飯。人物如今角宿稀。

建甯府鹿鳴宴詩

鶴書夜下建谿南。拔盡鄉英萬口談。帝闕佇聽臚唱九。賓筵試詠鹿鳴三。身名雖待文章顯。氣質須從道義涵。海內如今人物眇。掀天事業要奇男。

題張志山留稿

一眼高懸四海空。評詩誰出杜陵翁。紫鸞翠駁眞難並。翡翠鯨魚定孰雄。門外飛來清婉句。壇中報起寂寥風。錦囊已逐春風去。何日花前一醉同。

勸農有感三首

井卦分明說勞農。周人田制寓其中。但令此念純無已。可使吾民養不窮。數豆荒餐延野老。一篇腐語誨村童。爾忱不屬知何補。謾道天公靳屢豐。

三代興眈法已精。田官衆建日諄勤。一年一度情何簡。于縣于州責孰分。愛禮存羊斯僅可。賣刀買犢匪攸聞。周官千載何曾試。我欲重拈靜楚氛。
衍漾春郊徧野疇。不堪回首劍南州。勸農官吏渾冠鷩。力穡丁夫總帶牛。苦欲如邛嗟未得。自憐適越竟何求。春風萬斛濃于酒。一與畸人盪許愁。

次韻趙庸齋賀除閩漕

方向江湖拜散人。天王明聖尙哀臣。牽舟未得還三峽。乘傳何堪使七閩。作牧幸逢青眼舊。論交甯歎白頭新。却愁未稅周原鞅。公已催歸上要津。

庸齋再賦予亦再和

茗濱衰白一羈人。五玷皇華遣使臣。已自無恩及南楚。那能有福散東閩。豫憂刺史聲名減。不稱君侯佳句新。踏徧山川成底事。徒令沮溺笑知津。

次韻養源雙溪閣野眺

雨餘久不眺寒城。平楚遙知一望清。老杜頗慵看白谷。大王惟愛寫黃庭。剪裁花柳春刀尺。錯綜江山帝緯經。終待幅巾同遠望。逃他天械與天刑。

送不浮赴沿江制參二首

地褊難頒虎竹分。不妨六度作參卿。九江日落回君首。三樹風吹動我情。此別不堪分袂苦。何時重聽對

床聲到官休道無來使。溢浦雙魚自可烹。
瓶中儲粟苦無多。百口張頤劇雁鵝。王粲依劉甯得已。嚴公待甫定如何。且須省卻癡兒事。只好長爲醉後歌。瓜熟歸來再相聚。阿兄猶自種陽坡。

次韻上饒溫淳投贈

從來箕斗只虛名。石火光中了一生。寂寞九京蕤子政。荒涼三徑老淵明。我方遜世人爭棄。君獨憂時意未平。多謝相逢使如故。次山詞氣浩縱橫。原註來詩憶趙庸齋

送饒漕

已催四牡使駢歸。江漢旋歌命召詩。借問儀庭儀鸞鳳。何如當道臥熊羆。柳迎士行成陰密。樓得元規發興奇。少待邊亭永清晏。却歸簪筆侍龍墀。

次韻戴石屏見簡二首

探玉探珠遍九圍。先容分不到離奇。委心自信天行止。用世空慙道覺知。且可謾持東海釣。終期不負北山移。杜陵雖老心猶壯。盍與同尋蜀相祠。

入東頗亦交名勝。安道聞孫更崛奇。明月清風能我共。高山流水只君知。遙憐把酒懷人處。正是登樓望遠時。安得抽簪投海岸。相從朗誦快心詩。原註戴有快心詩數十章

送史深之入蜀

我讀江湖夜雨編。西風搔首一淒然。如何經濟二三策。價見琳琅千萬篇。小隱安能老丹嶠。壯懷猶欲上青天。此行若與涪翁遇。定把詩家古印傳。

次韻施秀才新樓有賦

白鶴山中熊豹姿。可憐營窟傍茗溪。無家那得還三蜀。寄跡堪嗤傅一齊。共詫閣能捫斗柄。誰知堂不愛樓題。庾成人已離騷國。何日同登醉似泥。

飲牡丹

尙記年時醉我賓。抽簪起舞坐生春。誰呼七七逡巡手。重現三三夢幻身。獨樂園中老居士。沈香亭北謫仙人。吾今望此如蜂蟻。莫怪名花向我颯。

夜坐有感

自嘆吾生行且休。誰能長抱畏塗憂。三番自取刳腸害。百鍊多成繞指柔。鞭鳳答鸞勞夢想。鬪雞走狗好沈浮。從今投劾歸漁隱。手掬清波蕩許愁。

次韻趙庸齋見寄

人在南山第幾重。采薇端可繼高蹤。褰衣辟世鋤三徑。閉戶求仁印五峯。周室如何廢常棣。楚人猶聽樂夫容。大書元祐黨魁傳。今代豈無人姓龔。

鄧侍郎再和予亦再答。案此云再答當先有倡答詩而今飲之。

烟雨淒迷主簿峯。傷心蕙帳十年空。夢魂吳蜀千山隔。歸路湘江一水通。莊舄相看均是客。虞卿何事獨嗟窮。天涯邂逅誠多幸。許挈詩囊入社中。

春日偶成

□年高臥響溪濱。閱盡諸公上要津。共怪朝無書□□。寧知項有鐵千觔。淵明肯仕義熙世。劉老要完元祐人。四壁新堂基已就。從今飽挹洞庭春。

七言絕句

蜀錦亭

故國□花負不同。景陽機裏織春風。莫將麗質驚丹卉。只把孤根託化工。

孤憤吟十三首

原註甲戌十一月以後邊事日急作此以紀一時之事

檜僂當權十五年。始終只被一私纏。人心失盡天心怒。燎火炎炎故不然。原註前漢成紀敘傳。炎炎燎天亦不揚。

金縉私許北方盟。君父前頭却隱情。今日禍胎從此始。罪浮孽□與權京。

先帝方歸盛德園。龍輻半夜浙江邊。孤臣泣血無他請。□□姦臣訴九天。

□功閣東萬人多。兵部門前雀可羅。悍將武夫□□□□□。甲與投戈。

□□元氣是人材。稍露光芒盡力摧。今日□□□□□。邦衡此語亦誠哉。

掃除學法陋諸生。精銳銷磨直可坑。乞斬三姦亦人爾。汝曹何忍負齋巵。

無罪無辜竄逐人。幾經大霈不霑恩。更將改正張羅網。結盡千千萬萬冤。
驅買民田自噫膺。大家破盡爲催租。幾多怨氣沖霄漢。天欲無誅可得乎。
督帳行趨建業東。壯哉迎敵氣如虹。勸君猛捨一腔血。莫學檀公誤乃翁。
乘桴頤浩元無策。進蹕豐公妙達權。甯死老身終不去。太皇此語可回天。
覆按山陵挈累行。金多季子橐齋輕。殿中御史尤堪戮。盡室逃歸駭一城。
囊封癸酉罄愚忝。第一親征次守江。啼得血流無用處。自憐弱步要豐扛。
阜錄新書幸已成。名山藏去復傳人。毋令十載編摩苦。竟與家書共厄秦。

原註文及
翁陳過

聞楊元極去國

傾仄難將一木支。薇垣累疏亦何爲。鳳凰本自翔千仞。不待區區奪我池。

題愛梅亭

生世梅花是故知。相逢不負歲寒期。自從一點梢頭白。看到青陰弄實時。

題同濂閣

霽月光風灑落人。與君同調故憐君。不須歎息知音少。後世豈無揚子雲。

比雲五主編

叢書集成初編

恥堂存稿
二册

中華民國二十四年十二月初版

撰者 高 斯 得

發行人 王 雲 五
上海河南路

印刷所 商 務 印 書 館
上海河南路

發行所 商 務 印 書 館
上海及各埠

〇六三〇七

嚴

(本書校對者 陳敬衡 張叔介)

